

及征虜副將軍雙虎紐兩臺銀印。戰器旗鼓軍籍等物。示東都城。時明人見所送獲昌江器械。及聞兩路救兵。東關至靈二城俱已覆敗。而心尙疑惑。未有盡信。猶且閉城拒守。至是見獲福、聚等。震懾不敢復動。○令諸將備木柵戰器。圍東關城。○冬十一月。令諸將校。上時務策。有益者。定加重賞。○點閱諸軍攻城車戰器。○明總兵王通。內官山壽。遣夏千戶。齎書講和。請開歸路。許之。仍遣以土宜海錯。○令大將阮雷等。齎書諭古弄、西都二城。○令主書侍史陳虎等。招寧遠州。後改復禮州。今安西府是。父道才吉罕。領兵象來。○頒新鑄錢。即天慶所鑄也。賞東關城門戰陣之功。○時有判大理正陳。名欽。以踈狂多疾。白於帝。乞謝事出家。許之。帝猶慰籍欲酬其勞。陳卽削髮入謝而去。嘗至青威古覽村寺居。後不知所之。○官軍圍城急。明人數戰不利。樵牧皆爲我所獲。王通雖請和。然猶豫未決。

諸軍築壘。王通悞悉衆出攻。官軍設伏佯走。明人追趕。伏兵奮擊大破之。通墮馬。幾獲。追至城南門。築壘門外。以扼之。帝又親率諸將。築壘安華坊。直抵北門。城一夕而成。帝旣許明人講和。令北江、諒江。修橋梁道路。又令諸路具船舟。備帆槳。送營。撥付還國。○帝以六條。諭將校軍人。凡爲臣子。事君盡忠。莫行欺詐。凡在衆人之中。宜務正直。莫行邪非。凡臨陣擊賊。執俘斬馘。莫相奪功。凡軍民之中。有姦虐非違之人。宜收捕治罪。而爾亦以爲監戒。毋令罪及其身。凡侍衛之臣。勿恃貴寵而凌虐諸人。凡趨事赴功。以身先之。使其下有所視倣。○二十二日。帝與明總兵官、太子太保、成山侯王通。參將右都督馬瑛。太監山壽、馬騏。榮昌伯陳智。安平伯李安。都督方政。掌都司事都督僉事陳璿。都指揮僉事陳祐。監察御史周岐厚。給事中郭永清。右布政使弋謙。右參政陸廣平。左

參政洪秉良、陸貞。按察使楊時習、僉事郭端。會盟于城之南。期以十二月十二日。班師。仍差人齎本請還我土宇。時通等在城困迫。所恃者援兵。又爲我所破。故講和乞歸。時我將士及國人。久苦賊虐。相率固請曰。賊多變詐。宜以兵制勝。勸帝殺之。惟行遣阮薦在帷幄。嘗見通蠟丸書。言勿以一隅之地。頻勞萬里之師。使用兵如原征之數。得六七八。大將如張輔等。方可圖之。縱得之不可守之。故薦審知虛實。專主和議。帝從之。仍命諸軍解圍以退。於是明以山壽、馬騏出菩提營。爲質於帝。帝亦令司徒思齊及黎仁澍入東關城。爲質於明。卒成和約。初帝以黎國頑。黎如箠爲質。至是欲得山壽、馬騏來會。故遣思齊、仁澍同往。○先是。帝遣阮薦撰求封書。差人進。曷表。乞立爲陳氏後。遞明國廣西雲南各一本。鈐國公沐晟得書。卽行飛奏。明帝得表。出諭文武群臣曰。論者不達

止戈之意。必謂從之不武。但得民安。朕何恤人言。遂遣工部尙書羅汝敬、徐永達等。齎詔勅封陳暲爲安南國王。罷征南兵。其勅書云。比者邊臣以書詞來。聞陳情懇懇。有契朕心。可大赦罪。無大小咸與維新。及令帝具陳氏見存子孫之名。來聞。遣使冊封。朝貢仍遵洪武舊制。○成山侯王通不待命而先班師者。以帝之急攻。而往復書詞諄切。皆薦奉旨撰也。○令同知阮滿、隊長阮雷。齎書往西都、古弄二城。撤圍。以二城未下故也。○土人香戶王萌等。將家小三十九人。奉匹段名香上進。時僞官土軍金香等戶之在城者。王通令自願或去北。或在南。各依所請。然願在者多。願去者少。○二十九日。遣使陳情于明。先是帝立陳暲。八月已遣使求封。至是以翰林待制黎少頴。唐安縣可菴人。即今慕澤也。主書使黎景光。並爲審刑院使。國子博士黎德輝。金吾衛將軍鄧孝祿。並爲審刑院副

使。此四名皆頭目也。內令史鄧陸、黎擢、武衛將軍杜冷、陳儼，並為安撫使。此四名皆

也。人將表文方物。代身金人二箇。銀香爐一箇。銀花瓶一雙。土絹三百

香二十塊。同王通所差還闕指揮等，並起送還京。總兵官安遠侯原領征

虜副將軍雙虎符兩臺、銀印一顆、官軍人等一萬三千五百八十七員、

官軍官二百八十員、民官吏典一百三十七員、旗軍一萬三千一百八

十名、馬一千二百疋，同就到。備細文冊一本，往燕京。陳情求封陳曷為

國王。帝既遣黎少穎等求封，凡東關城偽官及良民被脅者，悉令送還。

○十二月十二日，明王通遣步軍過瀘江先發，水軍隨後。時我將士及

國人深怨明人，殺害其父子親戚，乃相率勸帝殲之。帝諭之曰：復讐報

怨者，殺人之常情。不嗜殺人者，仁人之本心。且人已降，而殺之不祥，莫

大焉。與其快一朝之憤，以受萬世殺降之名，孰若活億萬人殺之命，以

息後世戰爭之端。青史所載千古流芳，豈不偉歟。乃命水路給船五百

艘。方政、馬騏領之。陸路給糧草。山壽、黃福領之。擒獲并出降二萬餘人。

馬二萬疋。馬瑛領之。征蠻將軍陳璿領鎮守軍從之。俱詣菩提營拜謝

回去。方政等感愧流涕。○十七日，明王通領步軍在後，與帝相話別。竟

夕而去。帝為具牛酒、綵旗、圖帳、禮物、厚餞之。西都古弄，至靈三城水步

亦陸續繼發。於是兵革偃息，天下太平矣。

按明史記云：前書黃福歸自交州。先是，馬騏累奏乞福還舊任，以我

交趾人思福之深，明帝從之。命福與柳昇偕行。及明兵失利，福為我

軍所得。下馬羅拜。我軍不忍加害。次書成山侯王通廢交趾帥師還。

水軍隨後。昇等既敗死，王通大懼，乃集將士議，以城不可守，戰不可

勝，不若全師歸北。眾皆從之。乃與帝約和，且為帝請立陳氏後于朝。

投醪饗士。父子之兵一心。以弱制強。或攻人之不備。以寡敵衆。常設伏以出奇。卒能以大義而勝凶殘。以至仁而易強暴。蒲滕之霆驅電掣。茶麟之竹破灰飛。士氣以之益增。軍聲以之大振。陳智、山壽聞風而褫魄。李安、方政假息以偷生。乘勝長驅。西京既爲我有。選鋒進取。東都盡從舊疆。寧橋之血成川。流腥萬里。宰洞之屍積野。遺臭千年。陳洽賊之腹心。旣梟其首。李亮賊之□□。又暴厥屍。王通理亂。而焚者益焚。馬騏□□。而怒者益怒。彼勢窮而力盡。束手待亾。□□□□。心□□。不戰自屈。謂彼必易心而改慮。豈□復□□。以速辜。執一己之見。以嫁禍於□人。貪一時之功。以貽笑於天下。遂使宣德□□重贖□無厭。乃命晟、昇之懦將。以油救□□□□。柳昇□引兵由丘温而進。本年本□沐晟□分途自雲南而來。予前旣選兵塞嶮。□□其鋒□□□調兵。截路以斷其

食。本月十八日。柳昇爲我軍所攻。計墮於支梭之野。本月二十日。柳昇爲我軍所擊。身死於馬鞍之山。二十五日。保定伯梁銘陣陷而喪軀。二十八日。尙書李慶□□□□。我遂迎刃而解。彼自倒戈相攻。繼而四面添兵以逼圍。期以十月中旬而殄滅。爰選貔貅之士。申命爪牙之臣。飲象而河水乾。磨刀而山石缺。一鼓而鯨剗。鱷斷。再鼓而鳥散。麕驚。決潰蟻於崩堤。振剛風於槁葉。都督崔聚膝行而送款。尙書黃福面縛以就擒。僵屍塞諒江。諒山之塗。戰血赤昌江。平灘之水。風雲爲之變色。日月慘以無光。其雲南兵爲我軍所扼於梨花。自恫疑虐。喝而先已破膽。其沐晟衆聞昇軍大敗於芹站。遂鬪藉奔潰。而僅得脫身。冷溝之血杵漂。江水爲之嗚咽。丹舍之屍山積。野草爲之殷紅。也。兩路救兵。旣不旋踵而俱敗。各城窮寇。亦相解甲以出降。賊首成擒。彼旣掉殘卒乞怜之

尾。神武不殺。予亦體上帝好生之心。參將方政。內官馬騏。先給艦五百餘艘。既渡江。而猶且魂飛魄喪。總兵王通。參政馬瑛。又給馬數千餘疋。已還國。而益自股慄心驚。彼既畏死貪生。而修好有誠。予以全軍爲上。而欲民與息。非惟計謀之極其深遠。蓋亦古今之所未見聞。社稷以之奠安。山川以之改觀。乾坤既否而復泰。日月既晦而復明。予以開萬世太平之基。予以雪千古無窮之耻。是由天地祖宗之靈。有以默相陰佑而致然也。於戲。一戎大定。迄成無競之功。四海永清。誕布維新之誥。布告遐邇。咸使聞知。大誥乃文臣阮廌所撰。○明將王通等。回至龍州。明帝先已料王通等困窘。事已若此。無可奈何。既遣羅汝敬等。齎書封陳曷。爲安南國王。罷征南兵。命通等北回。還我安南地方。朝貢復依洪武舊制。許通使往來。

潘孚先曰。陳家以建中興國。復以建新亡國。明人以甲午十二月十二日。渡江。又以丁未十二月十二日。還國。雖曰人謀之不臧。是亦天運之有數也。夫以太宗諱煚。少帝諱寔。皆以字相同。明人渡江還國。並以十二月十二日。相值。豈非天數之偶然乎。

吳士連曰。亂極治生。天之行也。聖作物覩。易卦時之亨也。歷考我越土宇之亂。未有極於斯時也。王業之興。未有難於斯時也。趙武因亂秦之亂。中原無統。群雄角逐。而併其地。未見其難也。丁先皇因吳氏之亡。十二使君。散無統紀。而肇基其國。亦未見其難也。黎代丁。李代黎。陳代李。皆承平之世。因衰亂之時。尤易爾。要其極而言。未免篡也。非有仁義之舉。暴白於天下。快衆目之欣覩。如湯武之革命也。胡氏篡逆。斷喪自招。狂明狡虐。思改封土。假仁滅國。殺戮恣行。我越人民。

肝腦塗地。幼子童孫。罹刺剝橫屍之慘。壯者南走占城。西奔大里。并
邑荒廢。社稷丘墟。爲兔窟。爲鹿場。爲棲鳥之野。爲藏豹之麓。賊從而
分州設縣。築城鑿池。居鎮戍之兵。二十餘年。變風俗於長髮白齒。胥
爲北人矣。嗚呼。爲亂之極。一至是哉。帝生於其間。稟聖神文武之資。
當天眷西顧之日。不忍視生民之塗炭。虐賊之憑陵。念天討之任。不
在我。而誰可尙慮。夫天悶愆而未通事。艱大而難濟。於是萃同德之
臣。淬倚天之劍。養晦藍山。俟時觀變。臨事而懼。不可疾貞。據險伏兵。
常以寡而敵衆。臨機制勝。每以弱而制強。器械資糧。多取於賊。經營
十餘年。困衝幾餘度。惟其謀之深。而計之熟。故其戰必勝。而攻必取。
一鼓而平。驩化。再鼓而定。演愛。爰張正正之旗。以臨堂堂之勢。渡海
濟師。古弄。至靈之兵。膽落。跨山進旅。三江。東關之卒。魂飛。王通。方政

之計究。完城固壘。以待援。不戢自焚。果見柳昇之北進。助桀爲虐。加
以沐戕之西來。笑兩路之援兵。張螳臂以當轍。豈不愚歟。况以至仁
而伐不仁。會見輿尸而皆就縛。檻中究獸。掉尾乞怜。卽開湯網之仁。
旋布舜階之德。竟放十萬之降卒。得全性命。以北歸。四海欣瞻。而遂
俟蘇之望。殊方懷畏。而勤職貢之脩。嗚呼。盛矣哉。是知亂之極。必治
之隆。仁之深。必懷之遠。天之行。時之亨。適運會之一初也。

按全書。以起甲午終丁未。凡十四年。屬于明。通計趙武帝甲午以下。
至明人還國丁未。該一千六百三十四年。并外紀武帝以前。二千六
百七十二年。今從越鑑所編。然不敢不錄全書。以備考焉。

戊申。順天元年。明宣德三年。春正月。明人旣還國。帝遂混一天下。以是年。爲
大定之年。

論曰。自天地既定。南北分治。北雖強大。而不能軋南。觀於黎、李、陳之時。可見矣。是以三國之末。雖既衰微。然徒內亂而已。至於閏胡暴虐。既極。而致國亾身辱。北寇凶殘。南民困屈。幸天心有在。宜生聖主。以義而征。以仁而討。山川以之改觀。日月以之復明。生民以之奠安。國家以之順治。由君臣同德。上下一心也。噫。亂極則治。於今見之矣。

○十日。陳曷飲毒卒。時群臣皆上疏言。陳曷無功於民。何以居人上。宜早除之。帝自知其然而心有不忍。遇之益厚。曷知國人不忍。乃潛駕海船。逃入玉麻州。至麻港。地。又安官軍追及獲之。回至東關城。飲毒卒。先是。帝既立。曷駐營空路山。徙率江。是歲。遷古弄城。自謂天無二日。國無二王。我無功於天下。而居尊位。若不早圖。恐有後悔。乃潛駕海船。而卒。一云。追殺之。曷自入殺棘中。乃陰與文祝天。而官聞者。莫不悲慟。天下冤之。後黎未及。陳曷作亂。兵以人為心。思陳後身故立之。以從人望。至是。冠人之難。居位。

太祖密言曰。我以百戰得天下。而居大位。為長。令司空、司徒、司馬、少尉。行遣等。管議定治軍民法。令使為將者。知所以治軍。為路官者。知所以治民。且令教戒軍民。亦知有法。凡所該事務。各有攸司。以進。○令將校百官曰。自古至今。治國必有其法。人無法則亂。是以師古立法。以教列校庶官。下民百姓。使知善惡所在。善則為之。不善則避之。勿至犯法。○令大臣、少尉、執令、諸路。如見偽官、土軍、人民。自各城出逃。而私匿不。解呈者。斬。并令諸路。觀察異色人去來者。敢有容縱。致賊人偽官透漏。而不察。路官及首隊人。並斬。○令頭目家將校子弟。各宜歸認祖貫田地。以杜爭占之弊。○明詔勅。凡朝廷所差。官吏、軍人等。被拘留者。悉皆發還。所留軍器。亦悉送納。帝乃出榜。嚴禁。有藏隱。明官軍一人以上者。殺而無赦。首者陸續。送回燕京。○二月。定鐵突火首軍人者。於隴崖勤

勞有功等項。該二百二十一人。第一功賜國姓黎問、黎歸、黎役、黎醜等五十二人。爲榮祿大夫、左金吾衛大將軍爵上智字。第二功賜國姓黎蒲、黎列、黎考等七十二人。爲中亮大夫、左奉宸衛將軍爵大智字。第三功賜國姓黎禮、黎巘等九十四人。爲忠武大夫、鈞鈐衛將軍爵智字。行遣黎景奉筭。○明冊皇長子祚鎮爲皇太子。○三月八日。明正使禮部左侍郎李琦。工部右侍郎羅汝敬。副通政使司右通政黃驥。鴻臚寺卿徐永達來。至京。先是。丁未年八月。帝遣黎少穎等進表求封于明。請立陳氏之後。十一月。明遣李琦、汝敬等齎詔諭并赦文。至是到京。○十八日。遣使如明。時李琦、羅汝敬等還。帝遣戶部郎中黎國器太祖親姪范誠等謝恩。樞密檢事何甫、何輩等告陳曷哀。與琦等偕行。○封次子元龍爲梁郡公。○大會諸將文武臣僚。定功行賞。視功之高下。定爲等級。以承

旨。阮鷹爲冠服候。司徒陳抃爲左相國。樞密大使范文功爲太保。並賜國姓。○分國中爲五道。道置衛軍。衛置總官。大小相維。上下相繫。又置各道行遣。分掌軍民簿籍。○遣官分祭各處山川廟社神祇。及先朝陵寢。○追尊考妣以上謚號。祖考汀爲昭德皇帝。妣阮氏廓爲嘉淑皇后。考曠爲宣祖皇帝。妣鄭氏蒼爲懿文皇后。○夏四月。帝由菩提草殿。就居東京城。○十五日。帝卽位于東京。大赦。改元順天。建國號大越。都東京。卽昇龍城也。○有西都故昇龍。○詔天下田租金銀潭陂桑洲等稅。○聽二年蠲以諸路老人。自七十以上免差役。孝子節婦聽官。○賞軍民之戶。○戶內三人充軍者聽免一人。凡歷代帝王及功臣陵廟。聽本縣事。○酒掃。○十七日軍號、國號、都號、達者以杖貶論。其買賣交易借貸文書

契券不依□書□者不用。○二十日。頒廟諱御名。凡正字諱文□□□用。音同字異則否。廟號諱五。顯祖昭德皇帝諱汀。顯祖妣嘉淑皇太后諱廓。宣祖憲文皇帝諱曠。貞慈懿文皇太后諱蒼。御名諱利。后諱陳。皇兄諱學。○凡有大赦詔令。皆稱順天承運睿文英武大王。號藍山洞主。○珥河產黃金。群臣上表稱賀。○追贈黎石爲忠武大王。入配寢廟。○以黎知運知左右班。封列侯。阮魯爲車騎衛總知。左右班掌國府二庫。總知領軍。皆外戚。知運以有質城中之功。後贈元舅關內侯。○旨揮諸路。被兵寇者。蠲免。○正諸僞官罪。○黎少穎等還自明國。先是。丁未年十一月。帝遣少穎等。陳情于明。本年三月。黎少穎至燕京進表。至是還。明帝賜少穎文綺衣及鈔。并勅諭我國。其畧云。立後事重。須合國人之心。非得獨擅可同耆老。具陳氏媯孫之實。奏來以憑。頒詔冊封。其所拘留人口。及

兵器。一應送還。○閏四月。指揮係軍民被賊捉。入西都。東京。古弄。至靈四城。已補入附鐵突各軍。而有田宅。入爲官物。卽撥還。○明成山侯王通等。還至燕京。群臣劾奏其罪。悉下錦衣衛獄。詔宥死貶爵。○指揮大臣等。再定路縣官。并鎮守官。源頭海口要害處等官。并用精能清廉正直之人。俱各得以薦。○鑄順天通寶。○青雲見。有翼有足。下有玉盤。左右似雙鯉魚相攝之狀。○夏五月十二日。帝與大臣共議定官員路鎮。及要害處鎮守官。并詞訟律令。職爵制例。國務事。○六月。指揮大臣等。考內外任。一等文武才幹敏辨。二等識字才幹敏辨。三等精寫草書。算外不入等。具爲一等。○指揮大臣文武等官。各舉賢良方正。薦舉得人陞賞。依舉賢臣例。若爲財爲親。薦舉非人者。依薦奸人論罪。○二十六日。指揮問大臣文武等。朕何如人。而天命歸之。何所賴而成大業。又當

今朝廷事務極煩。何先何後。諸將在朝。孰堪大任。可委千里之命。并執可輔導太子。○秋八月。以誕日爲萬壽聖節。即六也。○十日。定諸軍旗幟。儀仗、戰器、船艘等器物。中隊黃旗。上隊赤旗。下隊白旗。每衛主將大旗一面。每軍中旗一面。隊旗十面。小旗四十面。火戰船十隻。小哨船二隻。大將軍火筒一件。大樣火筒十件。中樣火筒十件。小樣火筒八十件。強弩五十件。鈎鏃五十件。長竿五十件。飛鏃四十件。楯每人一面。標每人。手箭一等用一人四枚。二等各人三枚。大刀各人用一件。每一軍用抄軍一人。每一隊用抄隊一人。○指揮。銅、鐵、桑麻、絲絹、膠漆、橄欖、花蠟、油、鹽、硝、藤。係本土出產。舊額官司。及先朝勢家人民絕嗣田土。并僞官逃軍田土時物等項。各具數明白。限明年四月上納。若隱匿并以官爲私。變易有無者。以徒貶罷論。○旨揮。改火頭爲正副伍長。○二十日。明有

勅流書。放還交趾給田土吏人等。回本國。○九月二十一日。明遣羅汝敬、徐永達等。復齎勅書來諭帝。以陳氏世得國人。令帝悉訪求陳氏子孫。奏來用頒繼絕之命。且謂此必頭目耆老未及徧訪。其有存者不敢自言。又諭以所留官吏軍人悉皆遣還。所留軍器亦悉送納。賜汝敬等鈔道里費。并賜我國使黎國器等鈔及文綺襲衣。命與汝敬等同行。○定文武官職品爵。賜功臣國姓。○出老軍定五伍。○冬十月十一日。旨揮。阮字停不諱。○十二日。旨揮。衛軍并置火首。爲正副伍長。○十九日。明使汝敬等還。帝遣何栗等。如明謝恩。并貢方物代身金人。且奏訪求陳氏子孫。無有遺者。及官軍出首者。亦已陸續送回。○十一月初一日。帝遣杜如熊等。如明奏言。陳氏子孫實無見存。及所獲明人官吏軍人。并軍器。并已送還。無有拘留監藏者。仍乞還帝所失女。先是。帝於亂離

之際。失一幼女。年方九歲。明內官馬騏收養。帶回燕京。進爲官婢。至是帝遣使求之。○二十四日。誅殘賊逆黨。名封、名汝笏、名安榮、名忠、名存、名士文、名崇禮、名確等。先是封等迎降明賊。助賊爲虐。拒官軍。及明賊平。乃出降。帝赦其罪。封等久稔惡。弗悛。更謀不軌。私相結黨。密作文書。陰使家人間行。遣明人使之舉事。則彼爲內應。齎書人爲大原鎮上將黃原懿所獲。帝乃戮其人而隱其事。八月再有黨人來告變。其事相同。至是帝乃下詔誅之。○二十五日。修田簿戶籍等務。旨揮各府縣鎮路踏勘澤洲田土。并金銀等穴。并本山出產。及舊額稅。及勢家人民絕嗣。皆入爲官逃軍等項。田土至己酉年二月中旬上呈。戊申籍已酉簿。癸丑年四月。造簿籍。并開出僞官逐項。○二十七日。旨揮置社官。大社一百人以上用三人。中社五十人以上用二人。小社十人以上用一人。○

二十八日。旨揮天下官員軍民等。期以明年五月。就東京。文官考試經史。有精者徐文官。武官考試武經。法令奇書等章。○十二月七日。旨揮文武百官等。孰能將妻子隱避山林。與朕圖國事。自忙催籍及蒲勝至靈籍可監籍。或子或孫。俱免軍民役。若己官者不在某子孫兄弟。不順道恣義。苟安降賊。卽不得認。違者以貶罷論。○二十二日。旨揮各府縣路鎮社冊等官。召對勘本路各縣社。及官私田土。潭洲魚果鹹鹽。各海門私魚瀝。浚也。水也。去并金銀鉛錫錢縷。○帝作萬壽殿。又作左右殿。敬天殿。勤政殿。○造戰器船隻。○鑄順天通寶錢。用五十文爲一陌。初陳大宗建中二年。詔民間用一陌。六十九文。正用七十文。已酉。二年。明宣德四年。春正月四日。旨揮百官及京都各路縣社等。係某人游手游足。圍棊賭博。官司及軍民。捉告治罪。賭博則別手五分。圍棊則

刑手一分。并無故。非官役。私聚飲酒者。杖一百。容止者。減罪一等。○旨
揮路縣社官等。係官印正官掌守。各路知府掌印。無知府用鎮撫管印。
各縣巡察管印。若無鎮撫知府。則用招討或防禦管印。有事共議方。可
使印然後用之。○七日。遣入內檢校平章事黎問。入內大司馬黎銀。入
內少傅黎文靈。齋金冊立右相國開郡公思齊。爲國王。攝行國事。遣入
內司寇黎察。司空黎仁澍。入內司馬黎理。入內少尉黎國興。齋金冊立
梁郡公元龍。爲皇太子。○八日。旨揮大臣文武百官。并各路府縣州鎮
等。係其人有事。至國王與皇太子。用啓字。不得用奏字。并稱呼曰國王
殿下。曰太子殿下。若國王有宣告號令。即用國王旨揮。不得用勅字。○
九日。旨揮。武自管領。文自行遣以上。孰有男子十五歲以下。九歲以上。
許入侍皇太子。今月十五日。就學堂點目。內密院官取簿。若武自同知

以下。至大隊長。隊長以上等官。文自尙書以下。至七品。孰有男子十七
歲以下。九歲以上。就國學點目。學官取簿。受業。○二十二日。旨揮大臣
文武。議國家大事。如戰士貧游士富。凡戰鬥之士。無尺寸之地居之。遊
手遊足。無益於國。濫有田土過多。或有寇盜。於是無人盡心於國。思戀
富貴。今勅旨與大臣。議定田數。給官軍民等。內自大臣以下。至老弱孤
寡男婦以上。某類若干。奏聞并錢帛等議呈。○二月二十一日。旨揮五
道諸衛軍將校軍人等。限二十七日。習水步陣。欠者治罪。習罷各分爲
五番。一番留。四番歸農。○二十六日。旨揮大臣及行遣等官。如見朕條
令。或有不便於軍國。或無故之役。或重斂賦稅。邪濫虐政。卽奏請脩整。
又旨揮諸言官。見朕有苛政重斂。虐害良民。功罪刑賞之不明。不依古
法。或大臣官吏將校。內外任職司。不奉法。受賂擾害良民。偏私非爲等

事。急上彈劾。若坐視容縱。以小事爲能。及虛言者。罪依律。又若官司入殿庭。或遇有衣巾帶脚不中法。起居縱橫不如禮法者。卽言官不得以爲事而彈劾。爲殿庭之事。已有鐵突五軍總管。及旨揮使御前鐵突內密院主察。○三月二十日。旨揮各道都總管管領。并京城各坊官員人等。今者各軍士分。及公侯百官第宅。俱有定分。可栽花木。種蔬菜。不得留廢空荒。不依者失本分。若公侯已賜宅。以安厥居。在鐵突士分。並不許過多。止自五高以下。不是鉄突士分。聽二畝以下至一畝。若已定撥土分。園宅再占大羅城內。別爲園宅地者。不聽。○夏四月十七日。旨揮大臣百官受造取金於東津。納官逐等。正一品金二兩。從一品金一兩半。正二品金一兩。從二品金五文。正三品金三文。從三品金二文。正四品至五品各一文。從五品以下無。○三十日。旨揮。係僞官前已有旨揮。

免罪贖命。並免田土。○五月三日。管功臣。該九十三員。縣上侯三人。黎問、黎察、黎文巧。亞上侯一人。黎銀。卿上侯三人。黎理、黎文靈、黎國興。亭上侯十四人。黎隻、黎文安、黎列、黎免、黎禮、黎戰、黎魁、黎頂、黎拙、黎磊、黎汝覽、黎抄、黎儉、黎栗。縣侯十四人。黎備、黎皮、黎否、黎希、黎受、黎雷、黎可、黎培、黎可郎、黎熾、黎犬、黎秘、黎國損、黎弼。亞侯二十六人。黎爛、黎多等。關內侯十六人。黎舌、黎璋等。冠服侯十二人。黎誑、黎遙等。上智字著服侯四人。黎克復、黎鞋等。○旨揮。係文武豪傑等。或遺逸沉滯失職。無人薦舉。或被仇讐抑蔽。卽急就少傅黎文靈所薦問。才德實者。奏呈擢用。不拘僞官士庶。以才德爲尙。○旨揮。係文武職官。武自上將爵智字著服侯以上。並聽服緋。文自入內大行遣冠服侯以上。亦聽服候緋。○二十六日。旨揮諸府路軍人。及山林隱逸之士。果有通經史。工於文藝。期

以今月二十八日。就省堂通身聽候。至日入場會試。中者選用。○二十八日。旨揮內外官文武。有精通經史。自四品以下。期今月二十九日。悉就省堂。入場會試。○三十日。定偽官田土各項。○六月十日。旨揮諸僧道。有通經典。及精謹節行。期以今月二十日。就省堂。通身檢閱考試。中者聽爲僧道。不中者仍勒還俗。○造貫籍。○秋七月五日。旨揮大臣百官中外文武臣僚等。會議錢法。詔曰。夫錢乃生民之血脉。不可無也。我國家本產銅穴。且舊銅錢已被胡人銷毀。百僅一存。至今軍國之務。屢爲匱乏。求其流通使用。以順民情。豈不難哉。昨有上書陳言。使以鈔代錢。朕夙夜思惟。未得其道。蓋鈔者乃無用之物。行於有用之民。甚非愛民用財之意。然古昔有以金銀皮幣錢鈔之物。無可相權何者爲最。其令大臣百官。及中外達時務之士。各議錢例。以順民情。庶乎不以一人

所願。而強千萬人之所不欲。以爲一代之良法。不可不早定。其議以奏。朕將親擇而施行焉。○八月十九日。旨揮天下軍民等。係僞官。文自知州。武自千戶以下。前已死。及土軍并民人入城。城陷出降。及胡氏舊官。被賊接去比地等人。今有妻子於各路縣社。或他。未著籍聽免贖命。若已入官爲奴婢。及賜百官。并有惡名。不在此例。○九月十六日。旨揮大臣百官。今後係某官言事。當以軍民事務爲急。不可以徇私情理爲先緣。朕常驗其情理。或薦舉。或獄訟。或公私事務。頗有互相容噫變易。是以知居官清少濁多。今朕按復犯人名。夢雲。名梁。箴等事。乃知庶官眞僞之情狀。故出此令。凡爲臣子。當盡其誠。以事君上。不可以私害公。事發之時。悔之何及。故茲詔示。咸使聞知。○二十七日。旨揮訓爾大臣文武百官。以務農桑。整軍伍。修治戰器船艘。○冬十月初一日。命文武大

大越史記卷之二十一
本紀一
臣。公侯大夫。自三品以上。薦舉賢才。詔曰。朕惟致治。必在於得賢。得賢必由於薦舉。是以有天下者。必以是爲先務也。古昔盛時。群賢在朝。濟濟相讓。故下無遺才。上無廢事。以成雍熙之治。至如漢唐之臣。莫不推賢讓能。更相汲引。肅何之薦曹參。魏無知之薦陳平。狄仁傑之薦張九齡。肅嵩之薦韓休。雖其才品有高下之不同。然亦莫不各得其人。以當其任也。今朕膺茲重責。夙夜祗懼。若臨深淵。正以蒐賢弼治之未得人。也。其令文武大臣。公侯大夫。自三品以上。各舉一人。或在朝。或在野。或已仕未仕。苟有文武知識之才。堪臨民馭衆者。朕將隨而授用焉。且進賢受上賞。古道然也。若舉得中才。則陞爵二等。或舉得才德俱優超絕倫等。必蒙重賞。雖然才之生。世固爲不少。而求才之道。亦非一方。其或蘊經濟之器。而屈在下僚。無人薦舉。與夫豪傑之士。伏於草莽。混爲卒

伍。若不自達。朕何由識之。今後君子有欲從我遊者。各聽自薦。昔毛遂脫穎。而從平原君。寧戚扣角。而感悟桓公。何曾以小節自拘哉。詔出之日。凡其具僚各盡乃誠。敦請薦拔。至於閭閻側陋之士。亦勿以銜玉求售爲耻。而使朕有乏才之嘆焉。○十三日。明遣禮部侍郎李琦。鴻臚寺卿徐永達。行人司行人張聰等。來諭。令求陳氏子孫。并令還明國人口戰器等行物。并賜何栗等衣鈔。遣隨琦等行。○十八日。旨揮大臣總管行遣以下。古人有言。曰君不擇將。以其國與敵也。朕常念之。日夜不怠。是以軍國大事。委之公等。而公等恬然坐視。不加之意。上負朝廷任使。下不恤軍民。何其怠於職事之甚也。今出此詔告戒。若不能改過自新。再如是者。國有常法。勿謂朕終有負於臣下勳舊之間也。○二十九日。明使李琦等還。帝遣頭目陶公僕。黎德耀。范克復等。貢金銀器皿。及方

物。往求封于明。并解諭還人口戰器。及求陳氏子孫等事。其求封辭畧曰。國人徧行尋覓陳氏子孫。并無見存。臣等思惟本國大頭目黎利。爲人謙恭謹厚。撫綏有方。甚得民心。有堪營攝。明帝覽畢。謂侍臣曰。此詞未可遽信。更當索之。仍詔禮部。賜公僕等文綺衣。遣齋勅還諭帝。及頭目耆老。更詢陳氏。如果無後。連名奏來處置。并賜公僕等鈔有差。○十一月。帝幸西都。拜謁山陵。賞扈從將校軍人。陞爵各一等。若上智字大智字。陞爵一資。用子孫代。已封侯。及無功勞者。不在此例。○十二月十九日。旨揮各府路州縣社官。係本社有田土多。人民少。而留荒者。聽本管等官。與別社人無田者耕種。若本社田主不得執占留荒。違者以強占罪論。○二十七日。旨揮刑官。係犯罪人。或徒流自三十字二十字。流在布政州。自十字六字。流在濱州。自四字至徒犒丁。在象坊者。俱送本

道。行遣領受。交付配所。○開試僧道給帖。

庚戌三年。明宣德五年。夏六月初十日。定諸稅額例。○再頒例律。改東都爲東京。西都爲西京。○冬十一月。往征太原石林州逆賊閉克紹。農得泰。是時克紹得泰爭立。故征之。帝至石林州。前門有詩題云。不辭萬里整師徒。惟欲邊氓赤子蘇。天地不容奸黨在。古今誰赦叛臣誅。○選步軍於菩提。先情願者。賞一資。○攢造戶籍。

辛亥四年。明宣德六年。春正月初一日。帝遣正使黎汝覽。副使使部尙書何栗。黎柄等。如明求封。并陳情及解諭求戰器。及陳氏子孫事。其辭畧云。大集國人。徧求陳氏子孫。的無見存。竊惟本國地方。不可無管攝。而常未奉朝命。此所以款陳而不已也。明帝納之。五日。以正使右侍郎章敞。通司右通政徐琦等。捧齋印章來命帝。權署安南國事。賜何栗等鈔幣。

遣隨敝等歸。按皇明通紀。明帝遣使。封帝。為安南國王。自是朝貢不絕。○二月。帝捉閉克紹、農得泰等回。三月至京。○定置內外各監舍人各司。從吳文通所請也。○冬十月初一日。明使章敝、徐琦來至京。齎印命帝。權署安南國事。二十日。敝、琦等還。帝遣審刑院副使阮文絢。御史中丞阮宗贊。隨敝等。如明謝恩。拜解歲貢金五萬兩。乞依洪武三年貢例。自後常貢不絕。明帝賜文絢等鈔幣遣還。○十二月六日。帝命作藍絢山實錄。帝自作序。着藍山洞主。

壬子。五年。明宣德七年。春正月。命親王思齊。將兵征忙禮州。州酋刁吉罕子刁孟旺出降。居于東京。立為司馬。後年殺之。○冬十一月。帝親征復禮州。○帝復征哀牢。

癸丑。六年。明宣德八年。春正月。選官男及國戚三路。北江二路。充國子監。○

親征復禮州班師。○夏四月八日。遣陪臣陳舜俞、阮可之、裴擒虎。往明國進貢。御前三分。皇太后、皇太子各一分。并解歲金事。○攢造戶籍。○秋八月。降長子思齊為郡王。以次子元龍繼承宗統。○帝回藍京。閏八月。彗星出西方。○二十二日。帝崩于正寢。初帝之經營四方。北擊明寇。西却哀牢。避實擊虛。所向有功者。止有武臣黎石、黎禮、黎察、黎問、黎銀、黎理等三十人。文臣黎靈、黎國興等父子之兵。鍬突二百。義士二百。勇士三百。象四隻。其輕勇及老弱護衛者。纔一千而已。帝嘗於萬幾之暇。與群臣論古今興亡得失之由。因及明賊之所以敗。我之所以得何也。群臣皆曰。明淫刑虐政。久失民心。帝反其道而用之。以仁易暴。以治易亂。此所以成功之速也。帝曰。卿等所言。固是如此。亦有未盡。朕昔時遭板蕩。棲迹藍山。本欲苟全性命而已。初無取天下之心。及其賊虐愈甚。

民命弗堪。凡有智識者。皆被其害。朕雖罄家所有。以奉事之。冀其免禍。而彼害朕之心。曾不少恕。義兵之舉。朕實出於不得已焉耳。

論曰。太祖卽位以來。其施爲政事。藹有可觀。如定律令。制禮樂。設科目。置禁衛。設官職。立府縣。收圖籍。創學校。亦可謂創業之宏謨。然多忌好殺。此其短也。又曰。帝承祖父之業。時遭大亂。而志益堅。晦跡山林。以稼穡爲業。由其憤強賊之陵暴。尤留心於韜畧之書。罄竭家貲。厚待賓客。及戊戌年。起集義兵。經營天下。前後凡數十戰。皆設伏出奇。避實擊虛。以寡敵強。及明人出降。戒戢軍士。秋毫無犯。兩國自是通好。南北無事。忙禮。哀牢。俱入版圖。占城。闍婆。航海修貢。帝宵衣旰食。凡十年。而天下大治。

史臣論曰。帝起義兵。未嘗濫殺一人。惟能以柔制剛。以弱制強。以寡

敵衆。不戰而屈人兵。故能革否爲泰。轉危爲安。易亂爲治。所謂仁者無敵於天下。其帝之謂歟。其有天下。而傳萬世之業也。宜哉。

○秋九月八日。太子元龍卽皇帝位。大赦。改元。以明年爲紹平元年。時帝年方十一歲。○冬十一月。阮薦奉勅撰碑文。翰林院待制武文斐奉書。○二十二日。歸葬于藍山永陵。廟號太祖。上尊號曰統天啓運聖德神功睿文英武寬明勇智弘義至明大孝高皇帝。○十二月初二日。遣陪臣黎偉。程真等。如明告哀。十九日。明遣正使兵部侍郎徐琦。副使行人司行人郭濟。來索歲金。先是明數遣使來。多索歲金。高皇帝乞依洪武三年貢例。明帝反覆不從。至是復使琦。濟等來。○扈從西京。造藍山殿。

大越史記本紀實錄卷之一終

大越史記本紀實錄卷之二

黎紀二

太宗文皇帝諱元龍。太祖次子。在位九年。東巡而崩。壽二十。葬道崇。資明智。運撫昇平。內制強臣。外攘夷狄。重道崇儒。設科取士。獻賦訊囚。率多寬貸。亦守成之良主也。然耽心酒色。暴崩于外。自取之也。

其母恭慈皇太后范氏。諱陳。清華雷陽群來鄉人也。以太祖起義六年癸卯。冬十一月二十日。誕生。順天元年戊申。春三月。冊封梁郡公。二年己酉。春正月六日。立為皇太子。六年癸丑。秋九月八日。即位。以明年為紹平元年。大赦天下。以生日為繼天聖節。尋改萬壽聖節。號桂林洞王。時帝年方十一。不假垂簾聽政。而天下之事皆自己出。

甲寅。紹平元年。明年。宣德九年。春正月朔。帝率百官謁太廟。又率百官同北使。

望闕拜於客館。四日。命門下司右侍郎阮富後改右刑院郎中范時中。與北使徐琦、郭濟等。如明。先是。明遣徐琦等。齎勅來問所拘留之人。及土貢之金。故帝遣富等往解之。六日。議遣宣撫使阮宗胃、中書黃門侍郎蔡君實、耆人戴良弼等。齎表文及方物。往求封于明。○旨揮大臣文武百官內外大小等。其畧曰。人臣之道。大要有二。上則愛其君。下則愛其民。愛君者必盡忠。愛民者必盡誠而已。凡其有僚。朕已委信。有不竭忠誠。荒廢天職。則國有常憲。問者求賢圖治。命諸人各舉所知。今既久矣。曾無應命舉一人。以答朕心。何也。○七日。宣光鎮平原獠人入貢。命都督黎問。傳旨諭之。使回本業。○九日。旨揮御前各軍。及五道諸衛軍。備辦糧食用二箇月。限本月二十日。就東京土分。點目習藝。若清化、永安、新平、順化各鎮鎮軍。卽就本府本鎮。土分點閱。違者治罪。○十二日。

旨揮文武百官自六品以上有所管及藩鎮父道首領官等。有嫡子孫或同異籍。並免稅。并當差若築鼎耳。堤路及警急事務不免。其嫡子孫各聽報名。赴監讀書。以俟選用。○旨揮京城及諸府路縣州社冊村庄等。今後銅錢破缺。猶穿得緡貫。卽流通使用。不得拒斥。若已斷缺。穿緡不得。卽不用。違拒揀擇。亦同罪。國初以來數出詔旨。禁民拒斥。而庫吏收稅。常揀好錢。民間禁不能止。故更有是令。○十三日。除內外大小官員黎豸等。一百五十六人。其輕赦徒流罪。潘季卿等亦預焉。○十五日。帝謁廟。是後命文官行禮。○帝出較場。觀大臣黎察等及文武內外百官。告天地神祇名山大川。刑白馬歃血。盟誓及差官。致祭天下各處神祇。○旨揮天下諸路縣官等。速具本路應試士人。期以本月二十五日。赴本道點集。至二月初一日考試。中選者。免徭役。補入國子監。若在各

路學讀書者。二十五歲以上。考不中者。還民。○以從候文隊杜順等五人。爲國子監教授。○二十八日。旨揮大臣百官。今後不得往來郡王所。郡王無人召。卽不得入朝。有私引入。或門者從入。及百官有私至其家者。加重罪。時有侍兒三人。走來奏郡王言多妖妄不順。故有是命。○以御前學生程清、阮天錫等。爲御前學生局長。朱三省、陳封爲局副。裴時亨爲太史丞。○二月初三日。諒山鎮管領黃原懿謀反。命北道司馬黎文安討之。○四日。考天下學生。中考者千餘人。分爲三等。一等二等還國子監。三等還路學讀書。並免徭役。○八日。以御前武隊莫吞等四十七人。爲諸路鎮撫。先帝時。各衛將校過犯。降爲武隊。至是復用之。○以黎大爲入內少尉。參知海西道諸衛軍事。太監如故。黎謙爲都押衙。知左班事。○罷南道行遣黎克復。爲判大宗正。時黎察既殺仁澍。疑克復

有怨。奏奪其權。使知獄訟。克復乃仁澍同母弟也。○以黎國楨爲南道行遣。知軍民簿籍政事。詞訟如故。以黎乘爲鐵突中軍行軍總領。黎醢爲殿前都檢點。同太監內外諸役。黎梯爲指揮使。○遣大司徒黎察、司寇黎銀、司馬黎列、黎盃等。選各道丁壯爲兵。旨揮係軍民諸色男。並選取。若文武自六品以上。有所管男。及國子監生諸色役。已有窄字。官賜公奴私奴。並免。若御前武隊鐵突。有一二三男。止免一丁。其軍民自三男以上。亦免一丁。餘並選取。○大司徒黎察。以前違事程宏伯。有可矜惜。使少保黎國興。編赦免舊官簿。詔敕旨。各與本道行遣從候。欲復用之。言官阮天錫、裴擒虎等奏曰。先帝有旨。黎國器、程宏伯、黎德興等雖有才。不可復用。臣下有謀叛逆。須告者。不容彼告。今若舉之。是違先帝旨也。且如宏伯等。誰更用之。遂却其名。令補軍伍。旣而慮宏伯在軍。必

復生事有害。於是。窄還民產。初太祖晚年多疾病。又郡王齊思狂悖。帝猶幼冲。而陳元扞、范文巧。皆常有佐命功。頗得時望。元扞又陳族子孫。而文巧亦京路人。慮他日有異志。外雖崇其禮。而內實疑之。丁邦本、黎國器、程宏伯、阮宗贄、黎德興之徒。逆知其意。爭上密疏。勸太祖決意除之。有不悅者。國器輒指爲二家之黨。死徙者甚衆。群臣皆畏其口。然太祖深知國器等皆傾巧小人。心常疾之。其後俱以事繼斥竄。仍慮其復進。故以是戒之。○從安插越忙父道琴公。冠帶入朝。○十四日。忙禮州刁孟旺母來降。刁吉罕妻也。刁吉罕既死。子孟旺奉其母歸故地。母獨先爲納款。帝問曰。孟旺何不自來。對曰。旺爲其弟道收引。慮忙來相爭。以故不得遠離其地。老妾先歸命朝廷。帝使人諭之歸報。孟旺入朝。○十五日。旨揮文武官員。諸人所薦之賢。所上之言。朕豈不聞。但衆人所言。不有

奇謀可采。所薦皆妄以常人。諸人有意爲國。卽更留心旁訪。或隱逸山林。或棲身村野。朝廷試用未及者。薦得賢才十二人。以佐朕圖治。如此可謂爲國盡忠。其賞不等。○二十二日。司馬黎文安征還。初諒山鎮黃原懿、黃文萼、阮世寧、阮公廷。皆本鎮父道。以歸國有功。並拜管領。仍居其地。宣慰黎圖、黎弄等。不能撫馭。原懿等皆懷怨。郡王有妾。因事退出。原懿來朝。見而悅之。潛載以歸。致其事露。有原懿奴飛豹者。因原懿撻。走入圖、弄等。乃騰告謂。原懿起兵。帝卽命文安將御前鐵突及北道兵。討之。及至則文萼爲鎮兵所殺。原懿等棄妻子。亾入吳地。文安乃散軍。搜捕四人親戚奴婢產畜。併及鎮軍妻子千餘人。歸獻。帝盡釋其民人。以四人家屬。給賜群臣。○夏四月朔。命百官迎吉州法雲寺佛。赴東京。禱雨。時天久不雨。而徒以迎佛誦呪爲祈禱。阮天祐奏疏曰。陛下修德。

錄冤囚。出宮女。而天不雨。請斬臣以謝天下。大司徒黎察惡其言直。疏未報。會有小雨。乃呼天祐問之曰。昨暮非小雨耶。又有清化、宣光等路官奏雨狀適至。併以示天祐。天祐無以對。○流監生阮德明于遠州。德明徙家赴監。有匿名書粘於道傍神祠壁上。有大司徒察、都督問。同謀殺翁士。即仁也。判大理語。德明召人來觀。既而自取毀裂。投水中。察疑德明所作。掠拷不服。將斬之。刑官以爲疑罪。乃得減死。流之。沒其家財。○父安府進御船。至大通場。夜爲雷霆所燒。○復以黎可爲榮祿大夫。諒山鎮宣慰大使知軍民事。以黎汝祖爲政事院同參議。爵明字。○赦輕囚數十人。以久旱故也。○十九日。清化府巴隆忙民叛歸哀牢。巡察黎統計之。斬其丁壯。虜男女三十餘口。○立斬罪囚。初威遠軍人阮稟。中軍鐵突程壽祿。以盜誘官賜奴婢人爲業。司馬黎列捕得奏之。時官私

奴婢多亡失。大司徒察怒甚。命刑官立鞠於殿庭。辭竟。曳出斬之。○占城掠化州人。占城主布提聞太祖崩。以帝初嗣位。疑中國有變。親將兵出屯近境。欲謀入寇。以虛實未審。無所訊問。乃使船潛入越海口。掩捕數人而去。民追格鬪。擒獲二人來獻。○二十二日。設齋于勤政殿。以旱災妨農。雷震燒船故也。○二十五日。五道各衛軍將校陞除。自衛同知管領。下至隊長。八百五十一員。在內任陞充。及御前各軍選授者。五百九十六員。有事輕赦錄用者。二百五十五員。內密官唱名給勅。自且至晡不能盡。其在內未陞者。賞爵各一資。○五月丁丑朔。輟朝。先是太史裴時亨密奏。五月初一日。有黑猿精啖日。日當食。日食則國有災。若得生猿殺以厭之。則災可弭。大司徒黎察信之。奏令宣光、太原等鎮官。督民蒐羅林谷。檻送猿猴。前後相繼。至日停朝。而行其法於禁中。百官不

得知。時亨惟奏禮部侍郎舊道士程全陽與俱。皆得厚賞。○五日。旨揮諸府路鎮縣社冊庄等。今年民丁。潭池稅。卽依癸丑年例。桑洲稅。依新定例。○十一日。京城失火。延燒數百餘家。人有死者。○十二日。遣五道軍。耀武於校場。引占城俘來觀。而遣之。○命入內司馬黎列。總督乂安。新平。順化諸軍。就新平。順化地方巡哨。若遇占城草賊。劫掠邊境。將校軍人。臨戰違令。及懷貳却退者。從先斬後奏。又命入內少尉黎魁。行遣總管黎焜。同督新平。順化諸軍。隨之。○十六日。命宣撫使阮宗胃。中書黃門侍郎蔡君實。耆人戴良弼等。齎表文及方物。往求封于明。行遣阮薦。作奏本。成。內密院阮叔惠。學士黎景綽等。欲改數字。阮薦怒曰。爾輩聚斂臣。罹此旱災。爾等所致也。叔惠告於大司徒察。都督問。察問怒之。讓薦曰。致天災。非此屬過也。咎在君相耳。公相責何太甚耶。薦辭謝曰。

叔惠以培克小才。居天下樞要。每有奏簿。皆欲損民歸官。以求合上意。故僕因事而發耳。非有所誹議君相也。察怒尙未解。然奏本猶因薦不改。○十八日。旨揮諸路鎮縣各隊巡檢司把關隘等。嚴加巡守。搜捕盜劫。○二十四日辰時。有青赤氣。狀如虹而短。並見于東北。○天微降霜。○斬左班漆作匠。匠人高師蕩。時調漆作匠各局。起報天寺。土木重大。師蕩勞於役作。竊言曰。天子不德。以致旱災。大臣受賂。舉用無功。有何善而必崇寺佛乎。爲人所告。大司徒察怒。審刑阮廷歷曰。彼敢妄言及國事。當斬。阮天祐。裴擒虎。奏乞免死。帝將從之。察曰。前從天祐等。不殺阮德明。使投匿名書相誣。今又欲放此人。餘人何所懲乎。天祐不敢復言。遂斬之。是日適有小雨。明日。察言於朝曰。使從言官。安得此雨耶。黎銀曰。多殺惡人。則多雨。但路骨難行耳。○二十八日。宣光鎮蒙恩州阮

啓使其子來降。命大臣諭而遣之。○六月。占城管象頭目藁芟二人來降。○八日。哀牢益忙使人來貢方物。賜織金衣二件。絹五匹。○十日。有霧氣。塞空而下。○十二日。陶祿來降。祿陶季容之子。初太祖之平賊也。歸化鎮父道僞府同知季容不服。將家屬。入雲南。至是死。其子來降。○海水暴漲。○十四日。雨。百官拜謝。○十七日。以審刑阮廷歷爲太原下伴安撫使。仍帶審刑副使。如故。○二十日。北道同知簿籍裴於臺。以天多災異。上疏四條。其一畧曰。願陛下內選皇兄國舅。老耄耆人。諳習故典。留爲入侍。訓誨厥辟。外置師傅。立爲砥柱。指揮百僚。其二畧曰。文武官員軍民。已被其罪。在各徒流配所。先帝所以懲之。今再見還官除職。管軍治民。有違先帝之心。不協天地之道。大司徒察見。疏怒甚。使人寫此二條。上奏曰。先帝以臣等皆累世舊臣。且與先帝間關十年。出萬

死以立朝廷。先帝素知臣樸鈍。故臨崩之際。以陛下託臣等也。今於臺所言。意疑臣等有所奸橫。而使陛下別立親以防之。願付之獄官。問其虛實。若於臺果離間君臣。則正以國法不赦。帝良久曰。於臺所言。雖有切害。何至若是。察奏往復數四。帝皆不從。天祐擒虎。復奏曰。於臺勸陛下不可委任大臣。是違先帝遺詔。而妄生嫌釁。不可不問其罪。右弼黎文靈執其疏來奏。帝乃可之。遂流於臺遠州。○二十四日。追尊生母爲恭慈國太母。初太祖不立正室。惟郡王母鄭宸妃與范惠妃等數人而已。國母亦先帝側室。於草昧時已先薨。及是。帝追念。尊爲國太母。舊神主在藍京。帝命元舅右班黎連及中書侍郎陳舜俞奉新神主及金冊。至廟行禮。○大司徒黎察起清潭。昭度等寺。成。宇九十餘間。○秋七月十一日。旨揮各道衛軍將校及路縣鎮冊社官等。凡治道以清刑爲本。

朕見軍人。皆越次奏告。連勾訟人。妨廢民事。勞擾朝廷。莫此爲甚。自今凡軍民有小訟。卽先就本社。社官論辨。社官不能。方就縣。縣不能。以次至路。至府。府不能。方就本道。本道又不能。然後奏聞其訟。田土亦如之。若評論官。宜用法公平。不可受賂偏曲。使有所冤。其大訟。方許直奏。○十五日。設盂蘭會。赦輕罪囚五十人。賜僧人誦經錢二百二十緡。○八月。賜國子監生及路縣生徒着冠服。并與國子監教授及路縣教職。着高山巾。初教授監書庫。皆太古巾。至是令戴之。○八日。令右僕射黎汝覽。往藍京立太母廟。○九日。斬盜者程堂。政事院同參議阮欣等奏言曰。堂白日偷竊。律不至死。殺之不可。不聽。○太廟厨兒阮注。以抑買市貨。杖八十。刺項徒象坊兵。時諸室厨人。多托宮中。以賤直抑買。市肆民人病之。阮天祐捕奏。乃加注罪。仍令徇殺三日。○定取士科。詔曰。得人

之效。取士爲先。取士之方。科目爲首。我國家自經兵燹。英才秋葉。俊士晨星。太祖立國之初。首興學校。祠孔子以大牢。其崇重至矣。而草昧云始。科目未置。朕纂承先志。思得賢才之士。以副側席之求。今定爲試場科目。期以紹平五年。各道鄉試。六年會試。都省堂。自此以後。三年一大比。率以爲常。中選者。並賜進士出身。所有試場科目。具列于後。第一場。經義一道。四書各一道。並限三百字以上。第二場。制、詔、表。第三場。詩賦。第四場。策一道。一千字以上。○試吏員考暗寫。一等補國子監。二等補生徒及文屬。○十八日。南道司馬黎列軍還。布提聞中國無事。先已引退。列到化州。欲還。會化州蠻道成。爲道論所擊。來求援。列乃引兵助擊之。得人口百餘。象數十隻。以歸。○十九日。命管轄黎伴。使哀牢。哀牢盤茹昆孤。爲叛臣。扭在所攻。力不能制。遣使來乞援。帝命伴。先往諭解之。

○旨揮五道行遣及各鎮總管宣慰等。其路鎮縣各官功績。付本道行遣。考覈各鎮將校。付本道總管宣慰。考覈其省院局官。即少保右弼。考覈左右班內殿各官。即押衙右班內密院。考覈各分爲三等。務要明當。不得徧私顛倒。○二十八日。以海西道參知軍民簿籍阮汝撰。爲北道同知軍民簿籍。○旨揮守皇城禁中諸門將校軍人女人內人等。今後或有各殿官人及大臣總管行遣。并女官等。入朝到禁門。即守門預先傳奏候勅旨。始得入。女人無品爵。並不得入。各殿內人女官奴婢。無故不得往來別殿。若守門不謹。容情私放濫入。及帶將鐵器等件。自一針以上。到禁中。不先傳奏。即論罪依律。○九月四日。頒紹平新錢六百餘貫。賜文武百官。○以御史裴擒虎。爲諒山鎮安撫使。以右藤縣轉運潘天爵。爲侍御史。○旨揮各鎮縣社村冊庄等。有赴京行役者。軍即將校。

民即路縣官。轉送其官私。公即取本縣文信。若在京軍人。及大臣勢家之人。或取本具差某事。即總管總知本衙本家給信字。軍民販賣。亦仰路縣官給文引。各鎮巡檢。及水陸各處守把。務要盤檢明白。無給文引。即截還。時各鎮人。多詐爲行役。誘人奴婢。故有是令。○司空黎銀同鄉人范鬢。因與銀奴爭田。私出不遜語。太祖起兵時。鬢從官軍。襲檜柵。軍至柵下。鬢逃入柵降賊。賊覺乃設備。軍不克襲而還。至是銀發鬢前事。使刑官追鞠。准奏斬之。大司徒察曰。今吾輩有權勢。而讐其鄉人。何求不得。後或吾勢盡。豈可使吾子孫。當其怨禍耶。銀厲聲曰。彼子孫猶能興怨。而吾子孫獨不能報乎。久之鬢乃得減死流遠州。○以峽山縣轉運使梁天福爲殿中侍御史。北江下路教授阮昭甫爲監察御史。昭甫上疏有可采故也。○御史副中丞阮天祐。以言事忤旨。免冠奏乞致職。

而去。○十六日。奏告天地及太廟。以鑄順天承運之寶。代天行化之寶。勅命之寶。制誥之寶。御前之寶。御前小寶。共六顆。○瓜哇商船。入貢方物。○哀牢昆孤。使其臣官龍。進象隻金銀。乞援兵。○旨揮與木忙少尉車芴。率哀牢南馬各蠻。救昆孤。○占城使齋書及方物來獻。求和親。太司徒察問曰。爾國私入吾境。捕化州百姓。何也。對曰。國王聞老皇登遐。今皇帝卽位。兩國不通。使款未信。故使將軍往境上問消息。將軍擅違教旨。私捕化州六人歸國。王怒。大將以下並加刑。護送其人。交還化州總管。不敢有犯。朝廷知其飾詐。然以彼能自來。故含容之。不加究問。○安邦路總管阮宗徐。同總管黎遙。貶三資罷職。本朝禁臣民不得私販外國商貨。時有瓜哇船。至雲屯鎮。宗徐等。當檢錄舶貨正數。前已將原數供報。後復隱詐改換其狀。而私販九百餘緡。自與黎遙各占百緡。

事發。故罪之。○命轉運黎壽老。起居蔡惠疇。使占城。○冬十月。蝗傷稼。差官分道驗田穀。○以南策下衛同知黎壽等。爲安邦鎮衛同總知諸軍事。管領范洪州爲安邦鎮衛同知諸軍事。審刑院副使程子昱。爲太原鎮上伴宣撫使。○十二日。符忙逆人丁桂子道賴。來首。有旨免罪。使還。○以前太子侍講阮晉才。爲國子監博士。○十一月。明遣行人郭濟、朱弼等。隨告哀使黎偉。來弔祭。至京。初四日。行祭禮。其祭饌皆自北道齋送。極爲豐盛。出迎承天門入。設祭于乾德殿。其禮猪一、羊一、食品、紙錢、幢節、香花。凡八十卓。祭官在左立。主祭在右。不奠酒。婦人隔帷。舉哀五日。宴濟等于勤政堂。○七日。太司徒察等。又宴濟等于客館。陳雜戲以觀之。從其請也。明使徐永達、章徹、郭濟等。前後數輩。於貢物之外。朝廷私有饋餽。一切不受。然聽其從人多齎北貨。重立其價。抑使朝廷買

之。○西道行遣左僕射黎焄卒。贈保正功臣輔國上將軍入內中書令鄉侯。謚忠簡。○命管領黎柄。內密院同知潘寧。御前學士局阮天錫。黎吉甫等。從郭濟。如明謝吊祭。○瓜哇客人入諦一作孫等進土物。有檀香數株。可爲屋柱。○藍山殿火。○冰凍山木死。○二十二日。帝誕生日也。以爲繼天聖壽節。尋改萬壽聖節。○蠲田租。及人丁稅。○追封大司徒黎察二代。○內密院何德政徒本道。屬丁范思明貶一資。德政爲行人。如明告哀。與明人圍棋。及與正使爭罵。思明襲帶北賣誤中點軍故紙。故皆降黜。時正使黎偉、阮傳二輩。多買北貨。至三十餘橈。朝廷惡其商販。欲愧其心。使人收驗。暴於殿廷。然後還之。遂爲常例。○十二月八日。哀牢人來降。進象三隻。車帟。何安掠等軍至。時哀牢柎柎、柎在等。已弑其主昆孤。而更立昆孤族人諭群。爲盤茹。使使齎象隻金銀來降。安掠

等遂與俱來。朝廷赦之。○言官潘天爵上彈章。論前軍總管黎受。當國喪娶妻。大起第舍。使家人出境。私與化外交市等事。時諸大臣皆私役軍人。大起第宅。帝因命天爵。徧入大臣家。驗看明白。帝問曰。諸大臣皆無此事耶。卿獨奏受。何也。天爵曰。都督、司寇、司馬。皆顧命大臣。宜正己以率百官。有所營爲。必循禮法。不然則告奏而後行。故臣等不可不言。且臣以受有數事。故併言之。今奉勅旨。使徧觀第宅。臣敢不盡職。於是又疏構新宅者。參知東道黎定等以下。至管領。二十餘人。奏之。帝皆不問。獨命勘受。都督黎問、司馬黎銀等。以受親勳之臣。營解之。帝亦赦受餘罪。沒私貲金十五兩。銀百兩。仍勅妾程氏。却受戶籍。聽贖爲外人。○復禮州刁吉罕男孟旺來降。勅賜爲入內司馬。知本州軍民事。爵冠服侯。○遣入內少保黎國興。入內右弼黎文靈等。奏告太廟。奉迎太祖及

國太母新神主祔。命文武官就都省臺議除喪。行遣阮薦等共議宜素服。滿二十七日。然後除之。○二十六日。上親坐丹展。先是成服太祖新神主。在乾德殿。帝每臨朝。立會英殿東楹以從事。至是動蹕坐展。庭設樂而不作。群臣上慰表。○賜南馬州道冕。爲本州大知州。知軍民事。爵明字。初南馬州屬哀牢。後能慕義歸順。至是遣子入朝。求爲內附。帝嘉之。乃授是職。仍賜冠帶并時服一襲。

乙卯二年。明宣德十年。春正月朔。率百官謁廟。還宮。素服臨朝。作樂警蹕。群臣皆吉服。進慰表。○初三日。明宣宗崩。皇太子祁鎮卽位。是爲英宗。改元正統。○旨揮大臣文武百官等。略曰。汝諸人不復如前守法。今後官軍治民或掌某事。宜盡心公平。愛恤軍民。無或偏私。如不悛改。必遭重誅。○四日。哀牢盤茹諭群。遣其臣刪莫察母等。奉金銀酒器及象二隻。

隨偉入貢。偉奏言哀牢荒亂。上下乖散之狀。○賜內外文武百官宴。五日。發錢賜外任文武官。有差。去年命各遣行遣。考覈外職功勤。第爲三等。至是依次行賞。其新除未有功過者。處以二等。與軍人阮公碯爲掌曆。戶部主事楊玄中爲靈臺郎。○以郎中范時中爲同知審刑院。前副中丞阮天祐爲清化路安撫使。○令諸道軍各就本土。近便分習陣。御前各軍講武於殿庭。○二十一日。言官潘天爵。梁天福。阮昭甫等。上疏曰。先帝櫛風沐雨。躬擐甲冑。勞神苦體。十餘年。而後定天下。陛下繼有成業。可留心學術。勤於求賢。以圖治功。今大臣進少保右弼侍勸講學。陛下起去而不從。其不可一也。先帝擇人爲姆師。以奉內訓。陛下嫚罵而不從。其不可二也。如宸妃惠妃。以嬖入教戒。陛下先使閉門不納。其不可三也。如陞衛管領。見陛下不讀書而執弓射禽。或諫止之。陛下不

從。又引弓以射之。其不可四也。先帝選取功臣子弟。使之侍學。陛下皆疎遠之。而內與近習侍內嬉戲。其不可五也。凡人君必求賢才能直言。極諫及有功者而賞之。今反與宦官戲而賞之。其不可六也。臣待罪言職。敢不條陳。願陛下臨朝之際。或接近大臣。或從群臣奏事。必平正尊嚴。假以天子穆々之容。敬大臣。勞有功。納直諫。以開言路。達下情。則繼志述事之大孝。不專美於成王。太甲矣。帝見疏大怒。詰問左右學黎景綽。官者丁誨等。偏至天爵等家。質問疏訴者姓名。且讓之。天爵對曰。此北江下衛同總管黎冷所告臣也。臣等重在愛君盡職而已。死亦何憂。景綽等乃罷。明日天爵入朝。奏言。虞舜聖人也。而伯益以荒怠爲戒。唐太賢主也。而魏徵以十漸爲防。臣等辱在言職。恐君有過。故效其狂愚。陛下納之。則芻蕘工技。各盡所懷。而陛下聖德益光大矣。帝意解。天爵

等復就職。○斬國子監生黎子昱。妻子田產沒官。子昱在監不讀書。而專於卜術符呪。誘盜人妻妾。并盜取十八房應用資。祭酒阮誠將奏之。子昱遂夜作狀。誣誠及武應先祭酒以下。及各堂長。相與潛謀反逆。大司徒察。知詐執之。使獄官阮允恭引問。子昱辭窮。遂首服。及臨斬。子昱誦天蓬天猷。不輟口。曰。此身已過。他身不可如是。○上幸泉洞。觀五道各衛習步陣。又閱水戰於珥河。○以轉運阮必敬爲三帶路安撫使。美菑縣轉運使潘仁。爲天長路安撫副使。○二月。明使禮部右侍郎章倣。行人司行人侯瑁。隨阮宗胃。來齋勅命。帝權署國事。○五日丁未。命少保黎國興。釋奠于先師孔子。後以爲常。○戊申。祠社稷。○命管領潘子曰。大夫程元僖。齋表文及方物。隨倣等如明。謝恩。○八日。告太廟。以權署國事之命故也。○命官。遍祭天下祀典神祇。○定田土。潭池。桑洲各

額。○頒國朝名諱。凡遇廟諱御名。正字臨文。並不得用。其有姓名並從改。如恭慈國太母諱陳。聽改程字。○以右僕射黎汝覽兼西道行遣。○流蔡君實于遠州。阮宗胄于近州。二人之奉使也。有司具本以先後之序。著宗胄爲陪臣。君實爲耆人。君實意不平。至明國。照次賜衣。無織金文。心有所憾。謂北人曰。我四品官。反居宗胄下。何也。及賜宴時。不服賜衣。着已織金衣以入。以承旨阮薦掌撰奏本。肆罵之久。又罵東道參知陶公僎。以其引宗胄與己同事。宗胄亦忿爭不已。遂致相毆。宗胄破面。從行者諫不能得。交訴於鴻臚寺。互相醜詆。宗胄又私過隆州北內官。納其禮物。又與隆州伴送官呂回。言使哀牢時事。竊言先帝從讒濫刑。皆以奉使外交忿鬪辱國。罪當死。以嘗有功。隨情輕重。各以流論。宗胄又多齎金帛販北貨。帝惡其違禁營財。盡散其裝。賜百官。○三月初六

日。鑄寶璽。成。命右弼黎文靈等。至太廟奏告。六璽皆以金銀爲之。順天承運之寶。藏而不用。傳國用之。代天行化之寶。征伐用之。制詰之寶。制詔用之。勅命之寶。勅諭及號令。賞罰大事用之。御前之寶。帳簿及籍簿用之。御前小寶。機密用之。然政事猶用牙印施行。新寶俱未用也。○旨揮大臣文武百官。今後公侯文武等官入朝。從人各有分數。一品五人。二品二人。三品一人。○旨揮諭文武百官軍民等。今後軍民。至家或衙。不得尊呼。曰君家。曰公衙。及稱臣申等語。如違。卽呼者受者。罪依律。其參預朝政以上官。軍民有申狀。方從僕申。公衙不得稱臣。○諒山、南策等路民疫。○以御前中軍鐵突黎等。爲哀牢、縛羅、鄭憲、陽忙上下等處防禦使、知軍民事。黎添爲南馬州蠶上下二州及蘭和縣防禦使、知軍民事。時哀牢各忙外言。歸國而反覆不定。故朝廷因各置官。以管監之。

○有再犯盜七人。俱年穉。刑官據律當斬。大司徒察等。見其多殺。心難之。帝以問承旨阮薦。薦對曰。法令不如仁義。亦明矣。今一旦殺七人。恐非盛德之舉。書曰。安汝止。傳曰。知止而后有定。臣請述止之義。使陛下聞之。夫止者。安所止之謂。如宮中。陛下所安也。時或出幸他所。不可常安。反歸宮中。然後安其所止。人君於仁義亦然。以之存心。而安所止。時或威怒。終無可久。願陛下留心。臣言於是。察、銀等曰。卿有仁義。能化惡爲善。煩以付之。遂使薦與天爵等。各保受其囚。薦曰。彼頑猾群童。朝廷法制所不能懲。况薦等德薄。安能化之。久乃判斬二人。餘以流論。○羅羅斯甸國人來貢。羅羅斯在哀禮之北。與雲南接境。衣服如雲南俗。而拜謝皆自發聲。○廣南府光州人來獻馬。○夏四月。哀牢摠忙等來貢。哀牢委忙。獻象壹隻。○旨揮諸路縣社官等。見有蝗虫發生。嚙害桑苗。

卽令禳祓以除民害。○五月。旨揮大臣。行遣及參知簿籍。參議臺官。刑獄等官。今後訊獄。及大臣准決日。不得欠目怠慢。或有病疾。必於衆呈白。不得欠缺。○旨揮各道將校及路縣鎮等。今方農務。路縣鎮官。不得輕動民力。○六月九日。旨揮五道諸衛軍將校等。各使人繕修蠹壞戰器。○帝日與近習。戲於宮內。大臣欲勸學。乃共奏擬。以行遣承旨阮薦。中書侍郎程舜俞等。文臣六人。隨二三大臣。分番入侍經筵。帝使丁福退還其奏不納。○帝寵小豎阮供。黎察等請誅之。帝不從。於是。察等稱疾不朝。潘天爵等奏曰。生知莫如堯舜。而猶以君疇成昭爲師。自古帝王之增益聖德者。未有不由學問。况陛下春秋方富。古今治道。未悉周知。大司徒察等。選用儒臣。入侍左右。蓋欲陛下爲堯舜爾。陛下胡爲忽宗社。而違其忠誠。使之憂悶不朝乎。願陛下思先王顧托之意。則四海

蒙福。而陛下享大孝之祿壽矣。○秋七月五日。哀牢又反。攻遠忙。其柎蠻擊之。獲人口十三。馘九級。來獻。○太原鎮父道農文聰。獻飲泉弓。其弓通中。可立飲水。○旨揮文武內外百官等。今卿等不奉公守法。其掌天下錢銀簿籍者。則沈滯留難。宜徵宜免。不曾分豁批奏。以致病民。管軍者。不恤民病。借用物件。悉令放散。以致喪壞。及至有事。方更營求。至於管民。惟務偏私。不思牧養。或放富差貧。市材營屋。從訟不平。惟黨與賄。幹事不敏。惟飲與舖。又藩鎮關隘等官。或有異人往來。漏泄逃亾。不肯用心詰捕。惟圖販鬻。以自培克。卿等共受天祿。治天民。而所爲如此。不逆天心耶。勿以朕言爲虛文。若能盡心竭力。改前行。率善道。輸忠愛。恤軍民。和僚友。平獄訟。勸農桑。屏盜賊。厲廉潔。則身榮家顯。福及子孫。如有不遵。自取誅譴。○十七日。賞內外任官年久勤幹者。一等爵一

資。錢五貫。二等爵一資。初帝使潛訪天下。至是。據奏。捉問貪污不如法者。藩鎮宣慰。五道將校。各路鎮縣。宣撫。轉運。巡察等官五十三人。○以報天寺住持僧惠鴻。爲沙門。賜緋。○化州蒲浪縣民阮如珪。爲其妻阮氏屯與義子阮郎所殺。事覺。阮氏屯及郎並斬。○秋八月十一日。雷震西道軍船。○蝗害稼。○二十二日。鑄太祖及國太母金像。成。命僧行點眼法。然後納廟。祀之。○二十八日。黎柄。阮天錫。奉北使回。奏稱。副使潘寧。行人阮吉甫。及從人等七人。遇大疫死。明國有吊祭。○九月。試國子監。各路教官。及有學軍民於雲集堂。時各教官。多不稱職。或互相短辱。事聞于朝。故試以汰之。仍試取軍民。以充其闕。○十八日。議減稅額。其在桑洲無田穀者。軍與桑地五高。民與四高。爲常業免徵。而不及鰥寡。潘天爵曰。鰥寡王政之所恤。今惠及軍民。而彼不預。彼非天民乎。大司

徒黎察等曰。軍民出力役。供賦稅。彼鰥寡者。於國何賴。且先帝時未嘗輕減諸人。卿默無言。而今既定例。言之不置。何也。爵對曰。先帝時。爵未獲居言職。今職當言事。欲成國家之美耳。豈私其身哉。於是。從鰥寡免租三高。○以黎可立爲門下司右侍郎。知西道軍民簿籍。○國威路上舍社。婦女阮氏玉與夫有子八人。夫染惡疾。阮氏玉不救養。盜夫財產。私通庫監阮白。以圖改嫁。絞罪。○帝於後殿。習騎象馳逐。會有進生山羊者。帝使騎象鬪之。山羊窮迫奮其角。象驚却墜井死。潘天爵與黎察。黎銀。諫止。帝默然。○二十六日。太史丞裴時亨密奏。十一月朔。日有食。請先用秘術。如舊年事。以厭禳之。帝用其術。賜錢五十貫。○冬十月六日。以黎景綽爲內密院使。仍侍經筵。陶公僕爲知審刑院事。阮文絢爲知內密院事。阮叔惠爲內密院副使。何栗爲右刑院大夫。○旨揮京城

左右伴。及各道衛軍等官。其本坊本軍。土分原有巡警。卽修復之。置人輪守巡警如法。又軍人坊人。於本軍本坊築屋。不得雜居他處。○十日。旨揮大臣文武百官男女等。今後係玄黃二色。不得穿用。外紺黃色不禁。○旨揮大臣文武百官軍民等。係京城土分。卽禁止不許種桑。其官賜田土。聽栽種花果等物。時太史丞裴時亨言。禁中忌種桑。故有是命。○帝以三品官着紅色衣。不合古制。欲命以青衣易之。大司徒黎察曰。先帝開基創業。意欲別其尊卑。以表功臣。其制既定。豈宜更改。從之。○十八日。上幸東津。觀五軍競渡。○有檳榔生。纔數節而結實。涖仁路安撫使白圭。以爲瑞。獻之。上不受。○罷政事院參議院。汝禮職。爵時降補御前武隊。汝禮以左遷。辭不赴職。大臣以王命不行。奏黜之。○二十九日。旨揮御前各軍。五道諸衛軍。鎮軍。及省院局人。各帶口糧。用一箇月。

并戰袍器用等件。限十一月十五日。盡數就土分點目習藝。○十一月戊辰朔。日有食。以裴時亨密奏。故不之救。○六日癸酉。雷虹見。○九日丁丑。天有聲如雷。京師及傍縣地震。○斬水棠縣轉運使阮廉。廉受人絹二匹。黎察追據太祖時旨。揮受賂一貫。奏斬之。廉子乞代命。不許。○占城來使。○發錢五十餘緡。給出征將校軍人。有差。○益忙來進象牙、犀角、銀、布等物。益忙與琴貴接境。見貴弗恭。恐禍及己。故先效順。帝嘉之。齋織金衣。賞其父道。仍賜使人絹匹。有差。○二十一日。以西道司馬黎孟爲總管。右弼黎文靈爲參督。督五道諸衛軍。父安鎮軍二萬人。討玉麻州逆人琴貴。戒以嚴飭將士。撫安人民。某總管、同總管、總知、違令。執鎖奏請。問罪術。同知以下臨陣時。違令及退却。許先殺後奏。玉麻在父安之西。哀牢之東。琴貴有衆僅萬人。太祖起義時。貴嘗發兵助順。授

大尉。尋復疑悔。獨引還。及賊平。乃大愧悞。然以其險遠。不能順服。貴爲人貪暴。禁民栽種。不得與己爭。大起宮室。以銅爲柱。妻妾以百數。厚斂其民。矯言修貢。實盡自入。太祖欲誅之。以時方有事。故未暇及。至是帝討之。檻送京師。○二十二日。繼天聖節。宴群臣。雜呈戲術。舞劍於殿陛。頒賜新錢。有差。○二十四日。占使辭回。賜之絹匹。使黎汝覽問之曰。占土壘等田。是我地也。爾乘我國多故。奪以自肥。至今猶不言還。歲貢又不供何也。對曰。臣等欲兩國親愛。且叩門求火耳。然臣國主昏耄。不能從信。臣願得朝廷使臣。往報國主。不然。臣等有所言。無憑信也。汝覽曰。朝廷豈無一箇使臣。但爾無大小之禮。使臣豈可輕往耶。遂行。尙書印信授之。○以知審刑院事陶公僕。爲審刑院使。兼禮部尙書。公僕頗諳典故及吳俗。時有明國使將來。帝欲公僕掌應接事。故有是命。○立鎮

官知軍民事。○選壯充軍。○十二月明使朱弼謝經來告即位。及太皇太后加尊。弼入境。先使人奏。帝吉服迎接。至開讀亦無舉哀禮。宴樂如常。弼等貪鄙。內嗜貨賄。而外文廉潔。每有金銀禮遺。皆辭不受。而視從者有難色。朝廷覺之。乃引從者。賜宴別室。因行酒。潛以金數鎰各納弼等懷中。弼等皆驚喜不自勝。弼等又多齎北貨。來立重價直。強朝廷買之。及還。其擡扛貢物及弼等行李。發人夫幾至千人。○令各道諸衛軍鐵突五軍等。潞東岸江。○十一日。以知內密院阮文絢。殿中侍御史梁天福。管領黎籠。左刑院大夫丁蘭。偕北使朱弼行。齎表賀明帝登極。及皇太后加尊。○新刊四書大全版成。○以杜文弄爲國威上路知府。何多滿爲天長路同知府。范時中爲東道參知簿籍。何甫、裴汝領並爲同知審刑院。阮宗仁爲僉知審刑院事。潘公益爲右刑院郎中。○命木忙

司空黎可參、少尉黎車芾等。共發本鎮忙兵。擊哀牢道瓊等。○二十七日。賜百官文武年節錢。有差。

丙辰三年。明英宗正統元年。春正月。議遣審刑院使兼禮部尚書陶公僕。內密院副使阮叔惠。如明求封。○夏五月朔。大赦。○六月六日。遣審刑院使兼禮部尚書陶公僕。內密院副使阮公據等。如明歲貢。○秋七月。充諸路生徒。○以黎叔顯爲長安路安撫使。顯洪州渾村人。有政事。人服其量。

丁巳四年。明正統二年。春正月。嘉興鎮每州土酋道跪、道湯等。率本州。執土官大知州道禮。縊殺之。據柵以叛。招討使何安掠。討平之。俘獲跪等。及其黨百餘人。送京誅之。乃以安掠爲招討大使。道跪子道車。爲懷遠將軍。兼本州同知州。賜冠帶衣服。○命行遣阮薦。與鹵簿司監梁登。督作

鸞駕樂器。教習樂舞。○十三日。明遣正使兵部尚書李郁。副使通政司右通政李亨等。齎詔勅。金印來封帝爲安南國王。印重百兩。紐象聯駝。以金爲之。及郁等回。帝以贐禮厚賜之。郁等辭不受。○十七日。以雄捷軍管領蔡士明爲正使。同知審刑院事何甫。右刑院大夫阮日昇等爲副使。如明謝恩。○奏告太廟。以明國來封故也。○賜武官戴高山巾。初武官戴折衝巾。至是許戴高山巾。與文官同。○令五道行遣。修造戶籍。○考試書算中式六百九十人。補內外各衙門屬掾。試法第一場暗寫古文。第二場真草書。第三場算法。凡民人及生徒許入試。監生及已在軍籍者卽停。時宰執皆開國大臣。不好儒術。專以簿牒詞訟責成有司。吏屬多曲事上官。故內外官缺。卽保除用。其倖進之徒。厭學術事力事。監生亦欲廢讀書。而求入吏者。故禁之。至是考試。冒倖請托。且相半焉。○行遣阮薦進

石磬圖。因奏曰。夫世亂用武。時平尚文。今興禮樂。此其時也。然無本不立。無文不行。和平爲樂之本。聲音爲樂之文。臣奉詔作樂。不敢不盡心力。但學術疎淺。恐聲律之間。難以諧和。願陛下愛養元元。使閭里無怨恨愁歎之聲。斯爲不失樂之本矣。帝嘉納之。○命峽山縣作石人。以敬主石爲之。敬主山名。○二月。帝如較場閱武。○以左刑院大夫丁蘭爲北江上路安撫副使。調段國士爲安邦路安撫副使。以內侍阮廷擢等三人爲轉運副使。武隊客隊長劉伯恭爲四廂指揮使。初伯恭爲成山侯王通通事。丁未。太祖駐營普堤。王通嘗使伯恭通問信息。太祖謂曰。王通果能班師還國。可封汝爲侯。及天下大定。擢爲隊長。至是大臣具以其事言。故有是命。○乙亥。奏告太廟。追上先帝先后尊號。顯祖昭德皇帝。曰顯祖昭德至仁皇帝。顯慈嘉淑皇太后。曰顯慈嘉淑欽順皇太后。宣

祖憲文皇帝曰宣祖憲文睿哲皇帝。貞慈懿文皇太后曰貞慈懿文莊獻皇太后。太祖統天啓運聖德神功睿文英武皇帝曰太祖統天啓運聖德神功睿文英武大孝皇帝。恭慈國太母曰恭慈光穆皇太后。以明國來封故也。○加封天下各處神祠。命官致祭。○丁景安等。以朝儀不肅。糾劾殿前都指揮使何梯、范內、黎籠等。各杖八十以下。於是朝儀稍肅。○考閱將校武藝。其考法。以射弓爲一藝。射箭手爲一藝。楯勝負爲一藝。三藝俱中者。給全俸。不中者。遞減。後以爲例。○三月。旌表烈女黎氏之門。黎氏名輦。國威中路福林人。故胡朝宿衛梁天錫妻。有姿色。早寡。無子。奉事夫家祭祀。終其身。少保黎國興以其事聞。故旌表之。○旱。令天下諸路縣祈雨。○乙巳。月有食。太史裴時亨密奏隱之。不救。○都知左右班亞侯黎運卒。贈中書令字號侯。謚惠知。運、恭慈皇太后之兄。

也。初。姓黎。賜國。○帝幸西湖觀魚。○以諒山宣慰使黎弄爲宣慰大使。左刑院大夫陶孟拱爲本院郎中。阮允恭爲右刑院郎中。祥刑院大夫阮長爲右刑院大夫。水棠縣轉運武廷彥爲司刑院大夫。底江縣轉運阮日新爲祥刑院大夫。○夏四月。禱雨于景靈宮。○帝欲觀胡氏手詔及詩文。阮薦采錄。得國語詩文數十篇。上之。○賜內外文武官制朝服冠帶錢。有差。○五月。行遣阮薦奏曰。比者臣等與梁登同校定雅樂。而臣所見與登不同。願回所命。初太祖時。命阮薦定冠服制。未及施行。至是梁登上書畧陳曰。夫禮有大朝、常朝。如郊天、告廟、聖節、正旦。則行大朝禮。皇帝服袞冕。升寶座。百官具朝服朝冠。如初一日、十五日。則皇帝御黃袍。衝天冠。升寶座。百官具公服幘頭。常朝。皇帝御黃袍。衝天冠。升金臺。百官着常服圓領烏紗帽。夫樂有郊樂、廟樂、五祀樂、救日月交蝕樂、

大朝樂、常朝樂、大宴九奏樂、天宮樂。不可一概用之。一鹵簿大駕。如鑾輅則大輅、象輅、馬輅。有九龍輿。有七龍輿。有步輦。有飛輦。如儀仗。則金戈、斧鉞、幢幡、旌旗、旄節、幟扇、五方蓋。駕馬隊伍。皆有多少之數。臣不勝盡錄。書奏。帝又命登定之。登因進冠服制樂器。大抵登與薦所定。多不合。其議樂器。輕重大小。多相違。奏不同。故薦辭其事。帝從登議。卒行之。帝謁太廟。罷倡優戲。不奏淫樂。○命侍御史阮永錫復職。時有同軍管領黎忠赤。私役軍人。及所行非違等事。阮永錫劾奏當貶。知詞訟鄭克復。爲忠赤營解。永錫乞併問之。帝不許。後日永錫上章辭職。未得旨。不肯就列。丁景安、馮榮奏曰。永錫何爲不使復職。帝乃命復之。○尙書令參知政事知北道軍民簿籍事亭侯阮覽卒。贈入內太保。諡忠靖。覽身黑而長。有才辨。○六月。旱。虫復傷稼。令諸路鎮祈雨。○以入內少尉參

知西道諸衛軍事黎慎。爲參知北道諸衛軍事。入內少尉上南策衛總管黎朗。爲參知西道諸衛軍事。天關衛同總管黎論。爲南策上衛同總管。判大宗正寺鄭克復。知北道軍民簿籍。清化路都總管黎理。爲北江下路同總管。知內密院事阮文絢。爲順化路知府。政事院參議阮宗除。爲清化府同知府。阮汝僕爲政事院參議。侍御史丁景安奏曰。汝僕貪污。三犯法。今又受四品官。何以示勸懲。帝不從。○庚午。京師雨。群臣畢賀。帝使人往諸路驗視之。○辛未。詔曰。近歲以來。旱蝗相仍。災沴荐至。宜省刑薄斂。以慰民心。○以南策下衛同總管鄭可。爲行軍總管。知車騎衛諸軍事。管領鐵突後翊聖軍。太監御前六軍知御前武士。御前中軍諸隊。殿前都校點黎醢。爲鐵突右軍同總管。右軍同總管黎囂。爲快路總管。快路總知黎祐。爲南策下衛總知。都指揮使何梯。爲殿前都檢

點。指揮使范內。爲都指揮。指揮副使黎籠。爲指揮使。時帝年旣長。聽斷旣明。而黎察猶貪固權位。帝益厭之。然外示包容。察不之覺。至是。帝與左右謀。以黎醢。黎鸞察之親戚。而鄭可舊與察有隙。遂出醢等。而以禁兵授可。察乞留鸞。且言曰。可若侍禁宮中。則恐失臣矣。帝入宮。後日帝使人報丁景安曰。大司徒察與陞次而不受。欲以黎文安爲海西道同都督總管。而黎察沮之。丁景安。阮永錫。乃劾曰。黎察專權之漸。罪固難容。奏上。帝付刑官勘問。察免冠奏曰。今以專權之罪與臣。是臣之罪。先帝所加也。於是黎文靈。黎銀等。皆爲察營救。帝不從。○入內大司馬參預朝政。北道同都督總管。亭侯黎文安卒。贈司空。謚忠獻。文安於武臣中。稍爲和易。每接士大夫。以禮。○以翰林院校勘阮克忠。爲西道大司馬衛主簿。中書著作胡德逢。爲內殿祿摺局副掌。前朝百局副掌。止於

八品。今陞六品。有爵至衣綠者。○丙戌。雷震城東門閣。人有死者。○罷大司徒黎察職爵。詔曰。黎察自專國政。妬賢嫉能。殺仁澍。以立己威。黜鄭可。而使衆服。罷於臺之職爵。使廷臣莫敢言。斥擒虎於邊陲。使諫官皆杜口。迹其所爲。皆非人臣之法。今欲寘諸典刑。以明國法。然以顧命大臣。有功於社稷。特從寬貸。可罷職爵。復裴於臺。同知門下左司事爵智字。參知西軍民簿籍如故。出西道參知軍民簿籍鄧得。爲諒山鎮安撫使。尋下獄。○以范盃爲東道行軍總管。黎理爲入內少尉。參知西道諸衛軍事。削奪黎文靈等功臣字及職爵。降爲僕射。○以黎慎爲司馬知北道諸衛軍事。參知政事。黎定爲司馬。參知南道諸衛軍事。黎朗爲參知北道諸衛軍事。黎爛爲北江下衛同總管。以千牛衛行軍總管。管領左翊聖軍兼父安路大總管黎焜。爲保正功臣。行軍總管。知金吾衛

諸軍事。管領右翊聖軍。出黎醯爲歸化路同總管。以入內司寇北道行軍都總管黎銀。爲入內大都督。歸化鎮驃騎上將軍。特進開府儀同三司。上柱國。國縣上侯。○秋七月。加少尉參知海西道諸衛軍事。黎犬參知政事。加捧聖壯士衛總管少尉參知政事。○以大都督黎銀女昭儀黎日麗。爲惠妃。廢黎察女元妃玉瑤。爲庶人。詔曰。黎察罪不容誅。宜斬以徇。朕待以不死。惟鄧得爲察謀主。圖危社稷。斬首以梟。阮嘉謨以知情不告。特流遠州。若黎文靈。黎領。黎受。黎醯。黎鸞等。當論依律。遇赦停論。黎邦以察壻。擅出入察家。特賜流遠州。○以諒山路安撫使裴擒虎。爲御史中丞。以其劾黎察也。○賜黎察死于家。詔曰。黎察今又陰養死士。圖害忠良。狡計奸蹤。日已發露。宜斬以徇。黎銀。裴擒虎。同奏言。察罪當死。然嘗爲大臣。徇屍示辱。恐貽譏後世。乃賜死於其家。妻子及田產。

皆籍沒。以察財物器用。頒賜群臣。○以太原下伴宣撫大使黎雷。爲車騎同總管。兼清化府路都總管。雷。農賁古寧人也。宣光鎮宣慰大使陳榴。爲金吾衛同總管。兼順化路都總管。阮景壽爲門下右司侍郎。參知海西道簿籍如故。內密院副使阮叔惠。爲同知尙書左司事。參知海西道簿籍。以入內侍省都押衙參預朝政。黎謙。爲尙書令。知海西道軍民簿籍。北江中路總知黎隻。爲太原下伴宣慰大使。○罷多錦縣轉運副使潘天爵。充本路軍。以察之黨也。○以同知審刑院事裴汝領。爲國威下路安撫使。北江下路轉運使阮從儉。爲諒山鎮安撫使。以奉宣使范察。爲入內侍省都知。知左右班事。陶公僕。爲門下左司侍郎。參知北道簿籍。○時西南方有聲如雷。暴風雨大作。○八月。以太監參知政事鄭可。爲少尉。以入內少尉總管前翊聖軍黎受。爲參知政事。○暹羅國商船來貢。

○時哀牢以兵爭馬江州。木州車參攻之。斬其酋紐蠻等二十餘級。俘獲二十餘口。送京師。哀牢遣使請之。帝赦遣還。○重隊阮文雷。奏乞採東海珍珠。以充國用。帝不聽。○以參知政事黎慎、杜大、阮熾、黎受、知詞訟事。少保知詞訟裴國興。判大宗正寺知詞訟鄭克復。各貶一資。郎中潘公益、大夫阮長。並罷職還民。時帝命大臣量定勘訟官。孰爲盡職。阮長以年老頗多疾。陶孟珙、阮允恭。本受明人官爵。太祖時。久爲勘獄官。克復、國興等。奏請遷他職。帝怒以國興、克復。保舉非人。又蔽匿貪污。求遷他職。故貶之。而罷公益、阮長。○令御前各軍。照樣書畫楯面皮笠。○翰林院待制武文斐。通淫妻母阮氏。事覺。坐斬罪。乞贖。遂流遠州。○旨諭大臣、太監及刑官等。曰。凡折獄者。據律文正條而斷之。其本條及罪名。卽取刑律。呈大臣、太監、臺官、五道。公同看過。衆官曰。是。然後斷之。蓋

以訟事或有冤屈。故欲覆勘明白。毋如前日黎察。徒以偏私賄賂而爲之。○賜左僕射黎文靈。知詞訟事。○以御前強弩火筒軍同知黎堵。爲政事院同參議。中丞裴擒虎奏曰。參議之職。輔政所關。非有老成不可也。今黎堵爲人多過失。而遷是官。如之何其可。帝不從。○中丞裴擒虎奏曰。陛下卽位以來。多更太祖成憲。如鹵簿司同監梁登。先帝以稍識字。用爲內人副掌。旣而見其便僻。不可親近。出爲文隊。今又授以官。願陛下思之。○九月。匠人高烈。進草帽二頂。并取民人。求充本局。侍御史阮永錫諫曰。古者人君不以奇技誇巧爲貴。故舜造□□。而諫者十七人。今有進帽者。願陛下思□□。櫛風沐雨。未嘗有此。朝罷。帝以帽示大臣及臺官。仍問之曰。此帽何足爲奇。而臺官見諫。永錫對曰。臣欲致君於堯舜之上。故先諫其未萌爾。帝又欲充十二人於冠作局。裴擒虎

上疏爭之。帝怒。以擒虎旣劾興國等。今又助之。所言前後不同。貶二資。降管領黎蒲、黎牢、黎磊等。還前鎮撫巡察等職。以黎察所舉用故也。○鹵簿司同監兼知典樂事梁登。進新樂。倣明朝制爲之。初登與阮薦奉定雅樂。其堂上之樂。則有八聲。懸大鼓、編磬、編鍾、設琴瑟、笙、簫、管、篳篥、柷、敔、塤、箎之類。堂下之樂。則有懸方響、笙、篪、琵琶、管鼓、管笛之類。○冬十月。流黎討等于遠州。時黎侃、黎克諧等皆武士。爲黎察所親。及察敗。有言其爲刺客者。考掠不服。刑官以討等聽從黎察。欲殺大都督銀。當斬罪。特旨免死。流遠州。妻子田產籍沒。○玉麻州道慕。捉其弟道悶等。及手下五十餘人。送京師。悶慕異母弟也。皆琴貴之子。官軍征玉麻時。慕歸順朝廷。而悶從父貴歸哀牢。貴旣誅。慕招悶還。旣至。又陰謀殺慕。故慕擒獻之。○庚午。五格成。賜鹵簿司同監梁登爲都監。○內密院

使黎景綽。受銀二十兩。事覺。按治當死。帝以其久侍經筵。特旨罷職還民。○十一月。授黎景綽爲翰林院侍講。御前學生局副。朱三省爲左刑院大夫。陳封爲右刑院大夫。阮日昇爲安邦路安撫使。○以白室縣轉運陳顯爲侍御史。時顯奏言。本縣有舊江支流一派。可通行舟筏。而總管黎翬。奏乞填塞爲己物。由是舟筏往來多被妨阻。中丞裴擒虎。奏顯不避權勢。可爲風憲官。乃拜是職。○頒新定聖節。正旦、朔望、常朝、大宴等禮儀註。初帝命梁登定大朝諸儀。至是成。進之。乃命傳寫儀註。懸于承天門外。帝謁太廟。百官着朝服行新禮。自此始。行遣阮薦參知簿籍。阮傳、陶公僕、阮文綯、參議阮了等。上疏曰。制禮作樂。必待人後行。如周公而後無間言。今使小豎梁登專定禮樂。國得不辱乎。且彼所爲。欺君罔下。無所憑據。如鼓鳴人。早朝報時。今君出班定乃鳴。古制君出時。左

撞黃鍾之鍾。而右五鍾應之。君入時撞蕤賓之鍾。而五鍾亦應之。今臨朝鍾一百八聲。是和尙數珠之數。如用明國制。君坐奉天門則有金臺。奉天殿則有寶座。今止有會英一殿。復有金臺。移轉不安。重設亦不可。是皆何等禮儀。夫造車則前簷後戶。今開戶在前。古制如此乎。人君出警入蹕。此禮之常。今閣門唱奏事畢。百官退。君尙坐。而蹕人始鳴蹕。何也。且登小豎。繞步御座。近君之側。臣竊疑之。登奏曰。臣無學術。不知古制。今之所爲。盡其所見而已。若行與不行。顧在陛下。臣安敢專。阮了奏曰。自古未有宦官專壞天下如此。丁勝自內出罵曰。宦官何爲壞天下。若壞天下。則先斬汝頭。遂付了刑官按察。獄成。當斬。特旨許刺面流遠州。○丙午。帝視朝。出入有鳴鞭。蹕出入鳴鞭自此始。○戊申。繼天聖節。是日早帝謁太廟。行四拜禮。還宮。鹵簿司盛設鹵簿儀伏於丹墀。帝御

袞冕朝服。御會英殿。大都督黎銀。率百官。着朝服。行進慶賀表禮。帝御袞冕。百官着朝服。自此始。○大宴百官。其插花供饌。皆用新禮。○暹羅國。遣使察鬻刺等入貢。帝以勅書使之齎還。并除今年抽引也。分。使減前年例半分。二十分抽一分。及厚加賞賜。外賜國主。分色絹二十匹。磁碗三十副。國妃。分色絹五匹。磁碗三副。每副三十五口。○有告大都督黎銀家。奉觀音佛。爲女惠妃求寵。帝御東城門。命太監杜大。領武士五十人。搜銀家。得所奉佛及金銀匹絹等物。明日銀入朝。免冠謝罪。帝命收銀家奴婢。問之。○十二月朔。以入內司馬行軍總管黎魁。爲入內司馬。參知政事。知西道諸衛軍事。○黎銀免冠奏曰。向者臣從起義藍京。今臣亦多病。卜師云。臣居宅內先有佛廟。因有污穢作殃。故再修以香火之緣。臣所棄妾阮氏。及所賜臣黎察妾陳氏。二人俱是臣仇怨人。與

臣頑奴。羅織以成其事。先帝知臣。每爲優容。今臣筋力頗倦。願放歸田里。以終殘年。若聽左右之人。考掠臣家人。病痛必生異辭。則臣身恐不能保。願陛下思之。○發嘉興軍營糧。與嘉興鎮官。貸食。初太祖征復禮州。令運糧轉到嘉興軍營收貯。至是嘉興鎮宣慰大使黎遙。奏言。廩與糧俱壞弊。乞轉送納東京。中丞裴擒虎曰。糧貯於邊。實爲良法。運就東京。恐爲不便。帝從之。故有是命。○令明人。着南人衣服斷髮。○督五道民人。浚諸港。○降黎銀女惠妃日麗爲脩容。女巫阮氏流遠州。符水師陳文坊徒象坊兵。○以政事院同參議阮欽爲演州安撫使。復禮州鎮撫使黎彥爲葵州知州。黎瑰爲乂安路鎮撫使。○追尊恭慈光穆皇后。爲皇太后。○令五道都總管等官。整理戰船。哨船。旗幟。嚴備。期明年正月習水陣。

戊午。五年。明正統二年。春正月。令四道民人。鑿長安。清化。乂安。諸港。○夏五月。命文臣督軍民。鑿清化路諸港。○降郡王思齊爲庶人。○二十七日。以災異下詔曰。比歲以來。旱蝗相仍。災異荐至。今四五月間。累次雷震。藍京太廟前園樹。驗其致咎。必有其由。抑朕德不修。而庶政荒怠。將宰輔非才。而燮理失宜。歟。抑任用非人。而賢否混淆。歟。抑賄賂公行。而獄訟冤濫。歟。抑土木屢興。而民力疲困。歟。將賦歛繁重。而民財匱乏。歟。引咎自責。大赦天下。凡爾大臣文武庶官等。宜各指其過失。直言無所隱諱。如有可采。必顯加榮擢。雖有愚戇迂踈。亦不之罪。庶可以回天心。弭災變。使國家永享無窮之福矣。○六月。補官男自六品至三品。爲親隨。各局二品至一品。爲正監副監。○冬十月十三日。遣審刑院副使阮廷歷。僉知內密院事程顯。侍御史阮天錫。如明歲貢。○十二月。明使給

事中湯鼎。行人高寅來言地方事。二十日。遣中軍同知黎伯琦。中丞裴擒虎。如明奏太平地方事。

己未。六年。

明正統四年。

春正月。帝親征復禮等州。時琴蠻擾害邊民。帝命將

問罪。哀牢從琴蠻剛娘等。遣其柅花。率兵象三萬餘來援。侵掠復禮等州。帝親董六師征之。○三月。旨揮定錢陌文數及絹布長短尺寸。并紙張等式。係銅錢六十文爲一陌。絹縷長三十尺。闊一尺五寸以上。細麻布並長二十四尺。闊一尺三寸以上。蕉布長二十四尺。綿布長二十二尺。紙用一百張。○夏四月。有彗星見西方。○秋七月望。月有食之。○八月。選補軍伍。大集軍期。○冬十月。皇子宜民生。○十一月。大赦改元。期以明年正月。改大寶初年。大赦天下。年自七十以上。賞爵一資。并賜大酬。

庚申。大寶元年。明正統五年。春正月朔。改元。三日。詔曰。朕惟古之忠臣良將。事君盡節。徇國忘家。今爾大臣內外文武百官等。食君之祿。當憂君之憂。凡軍民有所弊害。及朕行有所過咎。各宜明爭顯諫。匡其不逮。思盡人臣職分之當爲。以媲美伊、呂、周、召之列。寧可居平勃、王陵、霍、光、諸葛、敬德、子儀、李晟之下乎。苟能如是。則我之君臣。盡保全勳業於始終。共享福祿於悠久。庶乎不負黃河如帶。泰山如礪之言。豈不偉哉。凡爾有官。欽予是命。○帝親征宣光收物縣叛人何宗來。十九日。擒獲宗來子宗茂。二十日。斬獲何宗來。乃班師。獻捷于太廟。○二十一日。立長子宜民爲皇太子。○三月。帝親征嘉興鎮安順每州土官逆名儼。○選壯充軍。○攢造戶籍。○夏五月十五日。帝班師自順每州。以儼進牛象乞降。並雨暑方盛故也。○六月。冊封吳氏爲婕妤。居慶芳宮。卽光淑皇太后。

也。○清化路大水。

辛酉二年。明正統六年。春正月。運糧。三月。再征順每州逆儼。生擒哀牢將道

蒙及妻子於邏洞。并獲儼子生象。撞銅。儼計窮出降。帝乃班師。獻捷於

太廟。○降楊氏。賁爲庶婦。初楊氏賁生子宜民。帝立爲太子。楊氏賁自

恃益肆驕矜。帝含蓄忍容。降爲昭儀。欲其改過。而楊氏賁愈懷怏怏。無

所忌憚。帝以楊氏賁用心如此。所生之子未必賢。降爲庶婦。因詔天下。

使明知太子之位未定。○夏六月九日甲戌。皇子邦基生。○旨揮選秀

女於各縣。○置御前侍衛。隨次出身。○秋八月。選秀女於殿庭。囚逆女。

從阮氏路之計也。阮氏路。即阮薦之妻也。○冬十月。遣使如明。內密院副使阮日。僉

知內密院副使阮有光。僉知審刑院陶孟瑛。歲貢黎齊。古慎求冠服。○

十一月十六日。立皇子邦基爲皇太子。詔曰。建儲所以固本。立嫡所以

正名。此社稷遠圖。國家大計也。皇子邦基。玉裕金相。英姿秀發。既有宜君宜王之望。當正以嫡以貴之名。其令入內大都督黎列。齋勅立爲皇太子。皇太子宜民。可封諒山王。皇子克昌。可封新平王。○賜太妃范氏堯死。范氏堯初爲明內官馬騏所獲。及還。不能守節。誑誘惡黨。欲圖廢立。帝以年老。使入監京侍承陵。范氏堯以此益深怨望。罪極已著。因從欲讒。賜死。

壬戌三年。明正統七年。春正月。造殿宇。○三月。會試天下士人。賜阮直、阮如堵、梁如鶴三人進士及第。陳文徵等七人進士出身。吳士連等二十三人同進士出身。仍命製文題名。豎碑。進士碑記。自此始。○秋七月二十日。皇子思誠生。○二十七日。帝東巡。閱武於至靈城。阮薦邀駕。幸薦鄉崑山寺。帝發東津。入天德江。經桂陽縣大蒜社。芟橋白師墓。御舟不能

前。諸軍盡力引纜。亦不搖動。如有所止。帝乃遣中使。遍問本處老人。是處有何神靈。老人曰。古有名白師者。生前精於法術。沒後墓于江邊。每有靈顯。本土人重之。中使曰。祭以何物。老人曰。用犢。中使以其事奏。帝令以犢祭之。御舟乃進。○八月四日。帝巡至嘉定縣荔枝園。遽得虐疾。崩。初帝愛承旨阮薦妻阮氏路。容貌文章之美。召入拜爲禮儀學士。日夜侍側。及東巡。駕回天德江。大來荔枝園。與阮氏路。通宵而崩。百官潛行。六日。至京師。夜半入宮。始發喪。人皆言阮氏路弑帝。十二日。大臣鄭可。阮熾。黎受等受遺命。與黎列。黎孟等。奉皇太子邦基卽位。年方二歲。以明年爲大和元年。○十六日。殺行遣阮薦並妻阮氏路。罪及三族。先是阮氏路出入宮禁。太宗見而悅之。因與狎昵。至是東巡。幸薦家。因得虐疾崩。故有是罪。

論曰。女色之爲人害也甚矣。阮氏路一婦人耳。太宗嬖之而身崩。阮薦娶之而族滅。可不戒哉。

○九月九日。殺宦者丁福。丁勝等。以阮薦臨刑之日。悔不用勝。福之言故也。○冬十月。遣使如明。海西道同知阮叔惠。審刑院僉知杜時擘。謝賜冠服。侍御史趙泰。奏欽州地方事。參知阮廷歷。范瑜等。告哀。參知黎傳。都事阮文傑。御前學生局長阮有孚。求封。○命翰林院侍讀學士。兼知御前學生局。近侍祗候阮天錫。撰祐陵碑文。○十六日。葬大行皇帝于藍山永陵之左。曰祐陵。上尊號曰繼天體道顯德聖功欽明文思英睿仁哲昭憲建中文皇帝。廟號太宗。

論曰。帝雄才大畧。剛斷有爲。卽位之初。厲精求治。定制度。頒經籍。制禮作樂。明政慎刑。比及數年。典章文物。粲然大備。海內丕變。瓜哇。暹

羅三佛齊占城滿刺加等國航海修貢。後有逋臣宗來招集。僞號紀年。順每州土酋名儼。遠挾哀牢。敢行稱亂。帝親率六師。致天之罰。一旬而宗來授首。再駕而名儼就擒。真可謂英雄之主也。

武瓊贊曰。帝即位時年方十一。不假垂簾聽政。而天下之事。皆自己出。內制強臣。外攘夷狄。其聰明勇智。高出隆古。英明之主。况又體天地生物之心。行帝王不忍之政。讞獄訊囚。率多寬恕。其好生之德。卽帝舜之德也。嗚呼。若帝者。可謂存心制治矣。

仁宗宣皇帝

諱邦基。太宗第三子也。母宣慈皇太后阮氏。□□□□
生。三年六月六日。立爲太子。八年十一月十九日。即位。改元以
誕。日爲憲天聖節。在位十七年。壽一十九。葬穆陵。○帝以大
雅之。年有天資之明。令主也。□□□□
惻農愛民。具守成之主也。□□□□
惻夫。納諫。

癸亥。大和元年。八年。明正統。春正月初八日。酉時。有星隕于南方。時帝甫三

歲。□請太后垂簾預政。權決國事。○二月初二日。詔曰。比者皇天示變。星隕地震。朕甚憂懼。思所□□□可具知其由。抑朕臨政之初。未能輕□□□□不便於民。歟。將輔國大臣。變理失宜。陰陽□□。而致然歟。將獄訟失當。賄賂公行。刑賞冤濫。而致然歟。將守令未得其人。率行非法。擾害民間。而致然歟。將怨女未出。有傷和氣。而致然歟。抑讒夫猾謀。功臣受侮。未能伸雪。而致然歟。將土木興。而宮室崇歟。小人進。而君子退歟。言路塞。而上澤壅歟。女謁行。而私門啓歟。其令有司軍人等。各盡乃心。條其可以回天心。弭災變者。直言無隱。以匡朕之不逮。○有赤龍入大舍海口。○三月十六日。頒御名基。皇太后諱英。二字。并廟諱凡七。○夏四月。龍見于同賴縣壑渡。○五月。地震。○望。月有食之。○六月。以生日爲憲天聖節。○冬十月。帝釋服穿黃袍。御正殿視朝。百官穿本等

常服。以百官上言。據太史院陰陽災異等事。乞釋服從吉。故也。○十一月。明遣正使行人司行人程璣。來致祭。○十六日。遣御史中丞何甫。翰林院知制誥阮如堵。御前學生局長梁如鵠等。如明謝致祭。○二十五日。明遣正使光祿寺少卿宋傑。副使兵科都給事中薛謙。來封帝爲安南國王。○二十六日。遣參知簿籍程昱。內密院正掌程清。翰林院直學士阮克孝。如明謝冊封。

甲子。二年。明正統九年。春正月。選補軍旅。○考試士人。充各司屬掾。○攢造戶籍。○夏五月。占城主賁該。寇化州城。虜掠人民。命入內檢校太保黎盃。總管黎可。領兵十萬。征之。○秋七月。囚太傅黎列。○冬十月。地震。日有食之。○月食。○十一月。遣使如明。左侍郎陶公僕。御前震雷軍指揮黎括。歲貢。東道參知阮蘭。奏欽州地方事。

乙丑。三年。明正統十年。春正月。命文臣督天下各處軍。鑿清化路諸港。○夏四月。占城入寇化州安容城。五月。遇洪水。大敗。○六月。封皇弟思誠爲平原王。○二十五日。命入內檢校司徒平章事黎慎。入內都督黎熾等。伐占城。○冬十月。以災異下詔曰。朕位在德元。未知世務。是故比年以來。災異相仍。雷霆屢作。霖雨過度。泮水漲溢。防隄衝潰。而壞下民之屋廬。螟螣滋生。而害浦田之禾稼。潭池塌塞。桑菜滄稿。抑時政有闕。而傷天地之和。獄訟失當。而有陰陽之變。欲消在穹之譴。宜推宥下之恩。其寬條饒稅減罪。各有等差。○是月。以入內少傅參預朝政黎克復。男黎伯崖。爲駙馬都尉。尙皇第二女安南公主。○入內都督黎熾有罪。帝將明示刑章。以熾係勳舊。且從入議之。宜罷職。○七日。洪水漲入城中。高三尺。禾穀淹損三分之一。○十二月。命平章事黎可。領兵伐占城。

丙寅四年。明正統十一年。春正月。大會軍期。選壯者征占城。遣民運糧。就河華縣收貯。○二十二日。命入內都督平章黎受、黎可入內少傅參預朝政。黎克復等領兵六十餘萬。征占城。帝以占城王賁該再三傾國入寇。故命征之。○二月八日。遣使如明。海西道參知簿籍阮叔惠奏龍州地方事。同知審刑院事程真。清威縣轉運使阮廷美。奏□州事。○二十三日。黎受等諸軍。至占城。離江。□郎古壘等處。開通水路。築立城堡。與賊相戰。大破之。乘勝直抵尸耐海口。○夏四月二十五日。黎受等諸軍。攻開槃城。大破之。擒其主賁該。及妃嬪、部屬、馬象、戰器、并降將。乃班師。○占城故國主布提姪麻訶貴來先降。差其臣制咎麻叔婆被等來朝奉表稱臣。乞立爲王。○六月。以占城國主賁該。獻捷于太廟。大赦天下。留占城主賁該。及妃嬪三人于京城。遣使索取占人原在京城者送占。左右

及占降將還國。○秋九月十九日。遣海西參知簿籍阮宗仁。政事院同參議程弘毅。如明。告往年占城入寇事。

丁卯五年。明正統十二年。秋七月。詔曰。引咎責躬。惟至誠之能感。救災恤患。尤仁政之所先。朕自卽位以來。天災流行。百姓艱食。比者。已令該衙門。條其可便於軍民者。擇采施行。仍令汰出幽閉宮女。該道具奏該內民瘼等事。○九月二十九日。遣使如明。御史中丞何甫爲正使。審刑院同知丁蘭副之。歲貢。及奏欽州地方事。殿中侍御史程馭爲副使。奏龍州地方事。

戊辰六年。明正統十三年。春正月。以同知東道簿籍黎希葛。爲尙書右司郎中。參知南道簿籍。內密院副使黃清。爲翰林院侍讀。知御前學生局。翰林院侍講程封。侍經筵。○以管領阮宗彞。爲中北江衛同知。三帶路鎮撫

使。黎阿衡爲太原上件經畧使。○二月。以少保黎抄子黎壽域爲近侍三局正掌。復禮州司空刁孟旺有罪賜死。仍遣入內司馬黎醯。領兵五千人。護送孟旺二弟。遙授招討使。知復禮州。代領孟旺之衆。并籍沒孟旺家產。孟旺素凶暴。人不歸心。陰使人毒殺其部黨。部黨莫不仇怨。至是聞官軍至。爭先殺其二孤。拘囚其妻妾奴婢。并金銀財物。送納轅門。而黎醯善於慰撫。秋毫無犯。按堵如故。州人大悅。○東邊訛言。明使來會勘邊界。帝命東道參知程昱。前往體探虛實還報。昱到邊。曾無審訪。聽信行路人言。卽回奏。有北方欽差二司官。暨廣東鎮守總兵官。領兵馬來甚衆。帝命司寇黎克復。左右納言阮夢荀。阮文富。右司侍郎陶公僕。中丞何栗。并西道參同知阮叔惠。阮蘭。裴擒虎。程昱。審刑院副使程旻。內密院參知黎文。往會。又命下南策府同知黎舌。領兵萬二千餘人。

會同。安邦鎮各軍防備邊事。各賜錢有差。并起東道各路鎮縣官及民夫。備將科斂錢米牛羊鵝鴨鷄酒等物。候犒北軍。東方爲之騷動。及到邊。留旬月。探訪消息。寂然無聞。各以財貨至市北物重載而還。托言明欽差官。遇有他事不至。臺官何栗等。黨比不言。朝廷莫正其罪。○電。○甲戌。帝幸藍京。太后諸王皆從行。命大司徒黎慎。都押衙黎秘。留守京師。清化民覩駕至。男女相率。哩哩唱歌於行在。其俗哩哩。半男半女。携手歌唱。或相交足交頸。謂插花結花。甚於醜態。臺官同亨發。白大尉。可日。此瀋風惡俗。不可坐瀆駕前。可卽禁止之。○壬午。帝至藍京。謁陵廟。○三月朔。賜百官宴於江津行在。賜扈駕官自二品以上銀。各有差。賜三品以下。并在藍京官。及扈駕諸軍士。諸色人等錢。有差。時帝初行幸。故有此賜。○益蠻遣人貢犀角。金銀及三牙象一隻。道過又安府。命止

留其象於軍府。賜盆蠻使大紅緞子衣一套。絹十疋。瓷器五籠。遣還。○承天閣成。壯麗勝前。○臺官何栗、同亨發等。劾奏訟多沉滯。事在有司。非臣等所知。審刑郎中大夫程旻、阮文傑、黎伯遠等。皆叩頭謝罪。獨監察五刑程惟一。飾詞強解不已。上不報。卽命何栗等。就五刑院。檢得壬子至丁卯。共一百二十五案。諸大臣議分滯訟。與五道官臺官五刑。作急對理。勿致久滯害民。且讞獄繁多。刑官用力不敷。論減其罪。貶郎中阮文傑、大夫黎伯遠、阮允忠各一資。答各五十。郎中程公德、大夫范福。滯訟不甚多。答各五十。○夏四月。禁官員軍民。不得占公田。鑿池立園宅。○以舊都督黎熾爲少保。知軍民事。同知黎廬爲復禮州宣慰大使。○太傅黎文靈卒。年七十二。贈開府。謚忠獻。文靈開國勳臣。三朝元老。深沉有智畧。頗識政事大體。廟堂議論。多所建明。黎察之被戮。直諫不

阿。甘受譴責。爲公論所歸。然贖于貨。官人以私賄。終無一言及國政。惟信事浮屠。諄諄告其子敦。請名僧誦經。三齋七戒。無厚葬而已。○南道行遣關內侯致仕黎撰卒。撰雖勳舊老臣。而貪猥無能。時人鄙之。○阮有光等。回自占城。占使槃對僉占濕等。奉國書方物。偕來。賜宴于使館。命司寇克復主之。賜占城舊主賁該冠帶衣服。許會宴。及占使回。賜正副使衣各一套。絹各三疋。通事及行人絹各二疋。從人十九人絹共十九疋。令順帶所賜書回。○以翰林院直學士阮克孝爲侍講。奉侍經筵。審刑院副使陶孟珙。爲三帶路宣撫使。行三帶路事。阮子宴。爲右刑院郎中。膠水轉運副使蔣承禧。爲中都府少尹。舊侍讀阮天錫。爲翰林知制誥。○旨揮御前武隊管領。爾等自太祖以來。長番宿直。靡顧室家。今天下無事。宜分爲三番。輪流宿直。得省父母。以諸大臣議。連年旱蝗。官

乏民貧。而衛士增多。廩給不敷故也。○以司寇黎克復。提調國子監。又安知府阮回。爲右納言。知南道參知詞訟事。中書省屬高模。爲監察御史。○是月。省諸衛軍將校。御前各軍。每軍原八員。止留二員。鐵突五軍。每軍原四員。止留二員。前給歲俸用官錢。後撥與軍校卒。納替前歲俸。大臣議官多病民。故有此令。○旨揮內外文武等官。國家既有常俸。以養廉。又有常法。使之奉行。今爾等不能奉法。造公事。則假公營私。聽獄訟。則受賄枉法。行路之人。莫不嗟怨。究其弊病。諒非細故。今宜洗滌其心。潔己勉公。撫恤軍民。使彼稍安。卽爾亦安。若猶執迷弗悛。被人告發。或探得實。卽加非常律二等。本官上司及同僚官。不能規戒。事覺。舉罪依律。奪本分俸。○試近侍祗候局。第一場暗寫古文。二場制、詔、表。三場詩賦。賜阮璋等二十三人及第。升爲入侍局學生。○殺南道主簿譚草。

廬。草廬隱稅錢四緡九陌。擬不至死。太尉可等。以草廬曾誣陷阮天錫。深疾之故也。○何栗等劾監察五刑程惟一。不檢察獄訟。多致沉滯。惟一雖謝罪。心不服。乃奏曰。臣若任以糾劾之司。必能振肅朝綱。而激濁揚清也。臣等待罪法官。恐獄案速易。或致冤濫。故每遲回。詳審熟慮。非敢故淹滯也。因歷數臺官過失。謂彼徒能擿人之疵。而不能正己之非。抗言七辨。久之。帝以惟一廷斥言官。令杖八十。貶二資。○夏六月。加奉宣使阮車魯、阮昌參知詞訟事。○赦土牢囚黎列。以宗人黎克復、公主玉蘭等八人狀奏。懇辭求哀。乞屈法伸恩故也。○詔文武百官。齋戒。詣景靈宮報恩寺。祈雨。帝親拜禱。命大尉黎可。往古州。社名迎法雲佛像。詣京城報天寺。詔群僧誦經禱祝。帝與皇太后禱拜焉。賜僧徒綾綺十疋。新錢二十緡。是日。釋疑難囚二十四人。○詔經筵參議臺官翰林。中書。

等官。條上致旱之由。大臣黎受等。同上章自劾求免。勅諭不許。因下詔曰。頃年以來。災異相仍。水澇旱蝗。無歲無之。抑朕政治。上不順於天心。下未愜於民志。而致然歟。將輔相大臣不得其人。燮理乖方。舉措失當。而致之也。咨爾內外臣僚。下至士庶。有能為朕敢言。指陳朕及宰臣。其所行害民妨政之事。如有賢良方正。亦聽具由薦舉。條其事迹。務要得實。不宜援古虛文。以答朕問。○秋七月。宣光、歸化、嘉興三鎮。沱江諸路。大飢。知西道阮富奏曰。宣光、歸化、嘉興等鎮路。地僻山林。田土磽瘠。加以連年旱蝗。人甚阻飢。乞發所在官廩賑貸。庶得蘇息。乃詔發本處官廩假貸。俟至年豐。聽追還官。○熒惑守心。勾已旬餘。○歸合州進象二隻。賜以衣服絹疋、蠶器什物。初歸合本號存益蠻。附屬哀牢。自太祖開國。始來進貢。至是又進象。詔改為歸合州。○罷祥刑司二院大夫黎伯

遠、范福等。初伯遠鞠訟。常訊及御史中丞何栗。伯遠累詰之。由是栗含怒。至是栗撥拾諸訟家浮言。上章劾黎伯遠、范福、阮允中等。鞠訟獄屢入人罪過於慘刻。請汰外任。勾寘法司。命五道官鞠問其事。伯遠、福等心不能平。上章具栗罪過。論栗已經罪犯玷居。風憲不愜衆心。乞與栗對理。上留內不下。栗等聞之大怒。奏曰。臣聞之三代以來。未有被言官彈劾。而反訟言官也。今伯遠等與臣爭訟。是蔑視陛下之耳目。臣等因之罷免。固不足惜。但恐後之任是職者。將緘默不敢言耳。太尉可、司寇克復等固奏。伯遠敢與臺官爭訟。宜罷。從之。○詔禮部出榜。禁民間服黃色。着鞋履。及用雕畫麟鳳器用。○以北道參知院宗仁。知審刑院事。教授阮國杰。符世豪。為司刑大夫。御前學生黎霖。為御史臺主簿。○旨揮。禁世家子弟人衆等。不得養鬪鷄、舞猴、飛鴿、山呼鳥、文斑魚、雜戲等

物。以廢本業。○旨揮。禁內密官屬。御前將校軍人色役。不得與文武外任。交結往來。漏泄內事。○八月。禁大臣文武百官。及命婦女官。內殿諸色。妻妾婦女等。不得出入權勢家。交相餽遺囑托。以致妨害政事。若故舊親戚。無事往來。不依此律。○監察御史高模。免還原中書屬。模任職數月。上疏言國舅阮輔魯等。不可令參知詞訟。忤太后旨。托疾求解職。故免之。○罷裴時亨職。爲太史令如故。時亨奏。是月十六日卯時。月食。詔百官詣承天門救。月不見食。監察御史同亨發劾其罪。時亨無憂色。私謂親人曰。不過罰錢。昔枚中丞老手。猶不撼動我。亨發小輩。夫能何爲。明日上殿。峇文簿自若。亨發奏曰。臣職忝言官。凡政事得失。用人是非。皆論爭其可否。故古語云。言及乘輿。則天子改容。事關廊廟。則宰相待罪。今時亨不能謝罪。恬然自若。豈特侮臣。必有輕國法也。昔唐傅

奕、李淳風。精明曆數。學究天文。當時咸稱不及。然終於太史令而已。以時亨才藝較淳風輩。不啻千百倍蓰。而濫居門下省。兼知西道。何也。况時亨邪誕小人。於太祖時。妄言拆順天二字。已見廢黜。及太宗朝。又挾邪術。陰令殺猿取血。厭勝天變。至陛下諒陰之初。偶遭災沴。時亨托陰陽尅害爲言。妄言由居國喪所致。奏請短喪。以消天變。迹其行事。誠爲誣罔。臣恐天下後世。咸謂陰陽人爲參知。卜筮人爲安撫。自陛下始。從古未之有也。帝卽命罷時亨門下右司郎中。僉知西道職。國威中路安撫使司白圭。聞之懼。亦乞致職焉。初太史時亨。太祝白圭。同挾技術。出入諸大臣家。便佞辨給。巧於媚悅。大臣咸親昵之。以爲多才能。故時亨求爲門下右司郎中。僉知西道。白圭求爲國威中路安撫使。莫不爲之保請。而賢人才子。耻與同列。有題於東門涇橋云。天地否。路安撫。日月

虧道參知。其為詆戲如此。至是時亨、白圭同時退黜。掖議稱快。○國史同修阮文祚致職。○蝗。○會試天下舉人。取合格二十八名。及廷試。帝親策問。以禮樂刑政。賜阮堯咨狀元。鄭鐵長榜眼。朱添威探花郎。阮茂等十二名進士。段仁公等十三名附榜。堯咨武寧人。鐵長安定人。添威題於豬園曰狀元坊。有歌於街衢也。時司寇黎克復欲禁考官挾私。奏請考官歃血盟誓。考官盟誓自此始。然挾私之情莫能已也。有士子行制詞聯。宜下仄字。反用橫字平聲。初考批失律。不取覆。考官再搜取。謂其能文之士。批冠是場。妄謂橫字古人協作仄聲。人目為魯考官。時考官偏聽左納言阮夢荀。匿不發。監考同亨發。以夢荀之門人。知而不言。同考阮天錫。揚言納言偏私。夢荀發憤。詆辱於殿庭。抗言不服。而偏私之聲益沸騰矣。○上星犯太陰。○九月。詔太尉黎可。督百作諸局。造監

京廟殿。○以上洪安撫使潘仁。為同知審刑院事。中書舍人阮覽。為黃門侍郎。翰林院待制黃莘夫。為知制誥。聽撥官阮文典。武期。為左右刑院大夫。親隨舍人阮士興。為竹木司。都監北道屬程德良。為太原中伴教授。○以黎銀子黎儒宗。為保應軍大隊長。銀以開國元勳。死非其罪。子黎儒宗。久淪軍伍。諸大臣憐之。故有是命。○以知制誥陶天福。為建興路安撫副使。○冬十月。以古恒縣轉運副使程環。路教授程同。為鑿正刑院大夫。○占城人潘某。率男婦三百四十餘人。來降。詔分處各道。○十一月。下嫁正長姊衛國長公主于太尉黎受子黎适。公主方十歲。啞不能言。詔司寇鄭克復主婚事。時黎受具聘禮。求宦達者。競供貨物。以媒富貴。而錦繡綾羅緞絹。市庸為之一空。黎受又令各鎮路縣官。備辦牛羊等物。然皆浚歛軍民。以求媚悅。臺官亨發奏劾之。黎受免冠謝。

罪。然令已通行。各官仍具送來。黎受不辭。亨發亦不復論。至後亨發又奉禮物。詣受第拜謝。識者議之。○宣光鎮保樂州農世溫。探伽柵楊勝金。安富忙阮珠國等。有罪伏誅。先是溫、金等。資險不供賦役。至是又陰與珠國等。率眾拒命。安富忙父道阮允蘇。告其事。命總管黎輪。領本鎮軍討捕之。執溫、金等還。梟於都。○十二月。以御史中丞何甫。爲北道同知府。黎平爲父安同知府。○入內都督參預朝政。亨侯黎隻卒。隻開國勳舊。太祖時已參預朝政。因事失職。至太宗朝。復爲化州同總管。鎮守韃隘。占人兩入寇。圍其城。隻能以寡擊眾。屢摧破之。後又征占城。有功。累遷是職。至是卒。贈入內司空平章事。諡貞武。○以狀元阮堯咨。進士鄭堅。爲翰林直學士。以堅原都官六品故也。榜眼鄭鐵長。探花郎朱添威。爲中書舍人。進士阮伯驥。爲翰林知制誥。阮茂、楊執中。爲起居舍人。范德侃、阮

廷錫、阮貽厥、鄧宣。爲翰林待制。裴福、阮文質、潘歡、阮叔通。爲國史院同修史。附榜段仁公等十三人。充御前學生。○以天長安撫副使潘孚先。爲國子監博士。富良縣轉運副使范熊。爲助教。路教授武永禎。爲國子監教授。聽候官潘子曰。爲觀察使。○以御試合格鄧維謙等三十三人。充國子監監生。遞年試例。諸路士人。赴試本道。合格生徒中鄉貢。充監生。若軍民中鄉貢。不得充監生。仍還鄉貢。至是司寇鄭克復。始請以軍民鄉貢維謙等。充監生。而生徒中鄉貢。反不得入國子監。時議頗疑其納賄焉。○是歲。判訟死刑四十二人。

己巳。七年。明正統十四年。春正月。宴百官。舞平吳破陣樂。初太祖以武功定天下。太宗追念前功。作平吳舞。至是。帝思創業艱難。不念前烈。故復舞之。功臣有感泣者。殿中侍御史劾參預朝政黎秘。習儀失禮。少保黎杪。攬

越失次。禮部尙書陶公僕。不能□舉。各罰錢有差。○旨揮識字民人。限是月二十日。就本道考試。合格各送禮部會試。中者免此番選補。舊例。試民以暗寫。及書算。充各局。至是大臣議暗寫及本經四書義各一道。用乖所學。使免選補者少。故合格黃袍者。止八十五人。仍還民。免此番選補。免選試以暗寫及經義自此始。後以爲常。○選補軍旅。出老。○攢造戶籍。○二月。藍京廟殿成。遣翰林侍讀黃清。代阮覽行奏告。以覽已得罪於太祖。故也。○選丁壯六品以上孫。七八品男。並免。舊例。六品得免子。至是並免孫。七八品止免子。諸宦者亦免親戚一人。廣推蔭澤。自此始。○以細江縣轉運副使劉叔謙。爲侍御史。御前學生阮居道。爲監察御史。○賜前總管黎孟錢二十貫。孟以開國勳舊。久痼風疾。閑居十七年。至是。疾少痊。入謁。故特賜之。○命司寇黎克復。領百作諸局。四廂

天開衛軍。及太原鎮軍民。復開平虜江。自冷更名州至浮虜橋。二千五百丈。通于平灘。以便太原鎮往來。○三月。占城人來貢方物。詔却之。時占城國主弟貴由。囚其主貴來而自立。使其臣教爾某槃梭等。來進方物。帝省奏表。却之。曰。臣弑君。弟殺兄。古今大惡。朕不受獻。悉令還之。因遣同知右司事阮有光。殿中侍御史程馭。齎書往諭之。曰。爾等實事若何。則須來叙。○夏四月。復太子少保黎禮。入內侍中字號侯官爵。是日卒。禮世爲太祖家臣。深荷眷遇。朝夕侍衛。不離左右。志篤忠貞。膂力過人。太祖起義。妻妾患難。出圍脫險。厥功居多。太祖每奇之。嘗曰。若積其勳勞。致位宰相。非汝其誰。朕豈有吝於汝。但汝之才不稱耳。及臨崩。泣謂曰。朕若不在。誰復知卿。恐自此以後。被降黜耳。後被阮氏路譖。降爲太子少保。果如其言。至是病革。復舊職。四日卒。年八十二。贈鄉侯。謚忠節。

○政事院同參議高允恭、程弘毅、阮伯清、梅子傑同致職。臺官劉叔謙、阮居道、劾允恭、弘毅居政院大臣。尸位素餐。無所裨益。年逾七十。目昏耳聾。尚貪祿位。曾無廉耻。有傷風化。宜並勒還。於是允恭等皆乞致職。帝從之。左右納言阮夢荀、阮傳、阮日、入侍經筵。陶公僕、阮子晉等。乃相與乞致仕。然尚懷祿位。無有歸心。見帝一不允。但拜謝而已。後又相率。行謝恩禮。而真情自露。時人笑之。○是月旱。帝親詣景靈宮祈雨。命參知裴擒虎、禮部郎中阮璟。就傘圓三島山祈雨。皆不應。癸未日。下詔省躬。其詔曰。朕遭家不造。內而母后臨朝。外而大臣輔政。比年遭旱。禾穀不登。下民愁嘆。靜思厥咎。蓋有其由。抑朕不能盡誠。以享天心。致孝以奉宗廟。無施實惠。以及斯民。而致然歟。抑不能任賢使能。而所用類皆昏瑣。而致然歟。抑苞苴直行。女謁盛。而致然歟。將不謹度節用。而濫賞妄

費。有傷民財。以致然歟。將輔相大臣。未盡燮調之道。而致然歟。將將帥藩臣。不能愛恤軍民。多行浚削。而致然歟。抑守令不能撫字人民。惟務侵漁。而致然歟。將刑獄之官。不能持平。專在深文。貨賄幸免。而怨氣上騰。以致然歟。抑有司奉行。專尚虛文。使王澤上壅。下情不能上達。而致然歟。將權要之家。怙勢作威。而細民被害。以致然歟。抑明揚之選。未見舉行。而奔競成風。以致然歟。將主將顛倒軍功。以無爲有害於公道。而致然歟。抑仁政未盡施。而民猶有失業。以致然歟。將漁澤荒澗。稅額未減。民被倍納。以致然歟。抑勳舊子孫。未盡錄用。以酬其勞。而致然歟。積此咎愆。致傷和氣。若不稽改過之訓。盡省躬之道。可以上回天心。下蘇民瘼哉。詔下。是夕雨。○初立都大城隍神。及風雲雷雨壇。無祀鬼壇。以時祭祀。○命同知北道何甫等。送明人李文昌。還廣西。初太祖時。廣西

人文昌。將家屬及部黨百餘。逃來歸附。處於太原復和縣。至是送還之。
○何甫等上言曰。臣聞知過非難。改過爲難。言善非難。行善爲難。今天
降災旱。陛下詔條有曰。涸澤無魚。民被倍納。臣請減稅額。以施實惠。從
之。○五月。賜諸路鎮文廟學校。洒掃夫各二十人。教授夫各二人。以爲
常俸。從快路安撫阮有孚之言也。○左遷祥刑院大夫程環。爲天施縣
轉運副使。以天施轉運副使阮賢。爲祥刑院大夫。○金星貫月。○黎受、
黎可上疏。其畧曰。古昔盛治之世。遇天災變。人君省躬。大臣引罪。同心
寅畏。庶弭天變。洪惟順天年間。豐稔屢登。以至紹平。大寶。休徵荐至。陛
下大政未親。亦無過舉。而水旱相仍。災異屢見。意者臣等不能體陛下
仁民愛物之心。調燮失宜。如詔所云。伏望聖慈。召臣等於政事堂。問臣
等以軍國事。何事宜行。宜革。務要責實。無事虛文。皇太后懿旨。報曰。古

書有云。人事修則天時和。今官家幼冲。天災屢降。朕甚憂懼。今日之弊。
或有爲黨。而薦舉不公。或恃潛邸功臣。使妻妾囑托權要。或與家奴作
害良民。或有出入勢家。以求免罪。若何以革此弊。使我君臣。一心一德。
以消天變。上扶官家。守宗廟之業。下愜天下。暨軍民之心。○大雨。○斬
親隨正監黎仁立等于西市。仁立少尉黎蘭之子。與京城人阮壽域等。
聚衆賭博偷盜。恐其黨泄。使人就其家。誘來殺之。事發下獄。皆斬之。貶
蘭二資。以不能教子故也。○大赦。其赦條有減罪囚。饒潭稅等事。○轉
內外文武官。以審刑院副使程眞。爲北江上路安撫使。程昱爲禮部尙
書。北道同知簿籍何甫。爲清化府同知府。管領黎其等。爲各衛同知。宣
撫使阮遼。爲嘉興觀察使。知軍民事。蒞仁路安撫使杜時暉。爲審刑院
副使。禮部郎中阮璟。爲政事院同知。參議政事。前行遣黎蔡。爲左司侍

郎、同知海西道軍民簿籍。賜爵大僚班。蔡乃太傅黎列之甥。列被囚。罷蔡職。及釋列囚。復用蔡故也。○左遷審刑院同知潘仁。爲蒞仁路安撫副使。○出御史劉叔謙。爲安朗縣轉運副使。阮居道爲國子監直講。以其論允恭、弘毅故也。○以東道同知簿籍阮叔惠。爲門下右納言。太史令裴時亨。爲參議政事。諫官同亨發劾叔惠曰。本朝重任惟在宰相與行遣耳。今叔惠起身自小吏。以苛刻之政。冒爲北道參知。則乖道。○二人一袴。至於奉使外國。以詭計圖免。外國呼爲鬼。○辱國如此。將焉用爲。又劾時亨曰。時亨以邪術惑上。上用短喪。使陛下失孝於先帝。○上之。○先帝能行之。臣前既論時亨。○參知曲道。○陞政事院參議。且政者正也。其身不正。○事乎。臣聞解之三。○日。貞且。○寇。○叔惠。時亨之謂歟。太后問宰相曰。諫官論當。○黎。○等曰。用人。

不必求備。臣等。○求。○與夫親戚故舊。不得其人。臣等。○若新進輩。臣未知其實否。無。○乃。○秋七月。改火筒二軍。爲神雷、神電軍。善棹各軍。爲海鴻、海馬、海鯨、海鯨軍。撥撓爲海鷗軍。○置遠州配所於宣光。歸化二鎮。外州於安邦太棠縣。以徙海西三府犯罪人。若各路罪人。仍在舊所。○占城使臣逋沙破貪卒等。與阮有光偕來。帝命司寇黎克復。納言阮夢荀。詰占城使。以弑君之罪。占城使不能對。但拜謝而已。○遣尙書程昱。翰林直學士鄭堅。使占城。奉書諭之。且索我國人口。前在占城者。其書畧曰。凡有國則有君臣。此綱常之道也。爾占城人。何故乖常道。而致若此。昔王堤卒。爾等不能立其子。而立黃該。爾等又不能引君當道。敬事大國。以致敗亡。爾等已請立貴來爲主。不旋踵又廢。而立貴由。爾等反不覆忠。視君如棋子然。是何道也。

○八月。皇太后懿旨。諭大臣等曰。自寡人聽政以來。見大臣忠愛之心。左右輔國。內修外攘。以安天下。寡人夙夜思有以報其功。然德甚菲薄。愧不如馬鄧宣仁之賢。以盡優待大臣之道。今將命朝士。會議時宜。以爲一代之令典。令之無弊。卿等合體此意。以盡克艱之道。以至終始之節。無使臯、夔、稷、契、伊、傅、周、召。專美於前代。顧不偉哉。○貶化州司馬黎定二資。時何栗劾定縱降占城人。及強娶人家女爲妾。故貶之。○一日退朝。太尉黎可。見雲集堂前有獵網。撤去曰。無令上見之。以啓他日之荒禽也。○以中丞何栗爲西道參知簿籍。臺官簿黎霖。國子教授范維寧。並爲監察御史。以國子監直講尹子平爲安撫副使。內密院同知黎念爲副使。殿中侍御史程馭爲安撫副使。御前學士鄧允美、監生阮剛中、阮自得、高文齒爲各路轉運副使。監生除縣官。自剛中等始。○以中

北衛同知黎棹爲葵州經畧大使。黎其爲北江衛同知。○以國威爲中路安撫使。○明英宗憤北虜也。先入寇。虜也先號。從其臣王振議。尋親征。於七月十七日。駕行至大同。班師。八月十六日。駕至土木。地名。爲北虜所獲。十七日。英宗北狩報至。京師大駭。十八日。皇太后命英宗弟郕王祁鈺。魚欲切。權總萬機。二十日。皇太后議立皇長子見濡爲皇太子。時年二歲。仍命郕王爲輔。○九月初六日。明郕王卽位。遙尊英宗爲太上皇。改明年爲景泰元年。○冬十月。令各路諸色役。出熟米以需軍用。尋罷之。以議欲伐占城。而未果故也。○以下國威衛少尉黎蘭爲新平順化府少尉。踰年卒。○京城生兩頭人。恠置死。○十一月。命各路縣修簿籍。○大充監生魯純、范公粘等三十人。爲各道屬吏。監生充屬吏。自此始。○大都督黎犬男黎貫之。夜間聚衆毆殺人於都市。事發下獄。辭連內官及

諸有司男十餘人。獄將成。太后以犬居大臣典禁兵。帝所倚重。若殺之。恐傷犬心。乃枉法赦之。仍收償錢。還死者而已。諫官黎霖。噤不能言。至有都市童子扼腕。語曰。吾恨不爲臺官者耳。○占城人。還我國人口程元頌等七十人。以元頌爲政事院同參議。○新增律田產章十四條。初太祖欲均田。故畧田產章。至是增之。○以南策上路安撫副使阮直。爲翰林院侍講。歸化路安撫使阮如堵。國威下路安撫副使梁如鵠。並爲翰林直學士。路教授程伯恭。陶復禮。並爲監察御史。翰林院直學士阮堯咨。爲新興上路安撫使。中書舍人鄭鐵長。爲清化南路安撫使。朱添威。爲新興下路安撫使。國子監教授阮汝弼。爲建昌路安撫副使。教授爲安撫。自汝弼始。○以起居舍人阮茂。爲立石縣轉運使。楊執中。爲水棠縣轉運使。御前學生阮達。爲大蠻縣轉運使。○以黎少穎。爲三帶路

教授。初少穎爲審刑院僉知。以犯賊罪。罷職還民。終身不叙用。至是復以爲教授。○以國子監教授阮天縱。爲司業教授。阮超爲助教。梁夢星。武永禎。爲直講。司刑院大夫符世豪。爲古費縣轉運副使。○文盤縣轉運副使梁宗驥。受賂事發。獄成將斬。驥因左右求免死。太尉黎可曰。國法不可赦。又曰。盜一家猶不可赦。况宗驥盜一縣乎。再下對斷死罪。

庚午。八年。

明恭宗。景泰元年。

春。

三月。放黎列妻子於天牢。○秋七月。明以李

實充正使。偕北虜使北行。十五日。實等見明英宗泣下。行拜禮畢。見英宗所居。皮帳布幃。藉地而寢。因奏。今陛下服食粗陋不堪。因極言王振寵之太甚。以致陛下蒙塵之禍。英宗曰。朕今悔何及。實卽事賦一詩云。重整衣冠拜上皇。偶聞天語重淒涼。腥膻充腹非天祿。草野爲君異帝鄉。始信奸臣移國柄。終教胡虜叛天常。只今天使通和好。翠輦南旋省

建章。是時北虜酋長也。先命頭目率五百騎。送明英宗至燕京。百官迎于安定門。英宗自東安門入。景泰帝拜迎。推遜良久。乃送英宗至南宮。群臣就見而退。○冬十月。遣西道參知何栗爲正使。翰林院直學士阮如堵。國子監助教同亨發爲副使。如明歲貢。

辛未。九年。明景泰二年。夏四月。以災異下詔曰。比歲以來。旱蝗相仍。災沴荐至。今年方春。兩雹又作。抑政事缺失。而未能修舉。將調燮失宜。而致傷和氣。或刑獄冤濫。而未能伸雪。將賦役繁重。而下民咨怨。歟。靜思厥咎。蓋有其由。苟不施實惠。以慰民心。將何以答上天。而弭災變。其宥條有饒諸稅。逖從征。逖軍。逖民許出首。在獄諸訟沉滯。聽具由奏呈等事。○秋七月二十六日。殺太尉黎可及。男黎括。司寇鄭克復。及男駙馬都尉鄭伯崖。○冬十月。明遣正使行人司行人邊永。副使進士程惠。

來告卽位。先是明英宗北征。爲也先所獲。弟郕王祁鈺監國。因自立。改元景泰。故遣邊永等來告。○十八日。遣同知東道程真。中書黃門侍郎阮廷美。審刑院同知馮文達。如明賀卽位。

壬申。十年。明景泰三年。夏四月。囚太尉黎受。男黎是。以是行符呪土地。故也。○秋七月三日。以災異下詔曰。比歲以來。災異荐臻。歲屢凶歉。民物不遂其生。朕甚懼焉。實由朕上不能克享天心。下不能遵守祖宗成憲。任官不得其人。政事有所闕失。以致然也。今思所以弭災召和。可不遵成憲。而革弊政乎。其合行事例。用廉能。汰闕茸。行黜陟。免諸稅。理冤獄。賑恤鰥寡孤獨等事。○冬十月十五日。明遣正使刑部郎中陳金。副使行人司行人郭仲南。來告立皇太子。并賜綵幣。二十三日。遣使如明。正使審刑院范瑜。副使翰林院直學士阮伯驥。禮部員外郎朱車。賀立皇太

子。正使震雷軍指揮黎尙。副使侍御史黎專。謝賜綵幣。

癸酉。十一年。明景泰四年。春二月十一日。大赦。○會試天下舉人。賜武伯澈

等進士及第。○冬十一月。帝遣陪臣阮原橋、阮且、陳允徽等。如明歲貢。

○二十一日。帝初親政。改元大赦。以明年正月。爲延寧元年。其赦條則有贈功臣黎禮、黎備、黎篆等職各一等。給黎察、黎銀、黎可、黎謙、鄭克復、等官田一百畝。并存恤鰥寡孤獨。及旌表義夫節婦等事。

甲戌。延寧元年。明景泰五年。春正月。鑄延寧錢。選補軍伍。并汰出老。○攢造

戶籍。○夏五月。黃龍見于西門人家鍵瓠之下。○又安地方竹葉黃。

乙亥。二年。明景泰六年。命潘孚先撰大越史記。自陳太宗至明人還國。○冬

十月。玉麻州有鼠。大如猪。

丙子。三年。明景泰七年。春正月三日。大宴百官。諒山王宜民預焉。○二月四

日。御史中丞范瑜等。劾奏金吾衛同總知黎适。不能奉法。於今年會集軍期。差軍人七十人。造私船。損費軍錢凡十八貫。乞刑官對實按罪。以懲其餘。黎适奏曰。臣本藍邑人。曩自藍京回。所有私船朽爛。臣將扈駕役。於今年暫差軍人飭助。若所費軍錢則臣不知。瑜又奏曰。臣等忝居言職。不可畏避權勢。亦不可緘默不言。誠如聖諭。臣今劾奏黎适差軍造私船。臣等已令臺兒探實。又勾本軍火頭端稱。皆言實有。今黎适謂臣等以私彈劾。豈臣等以恩怨言事耶。○六日。賜盆忙頭目衣帛。有差以盆忙頭目耶叱。於正月貢器物也。○旨揮令州父道琴公。爲振遠上將軍。命員外郎鄭瑤。齎旨揮往諭之。以賞賜大紅織金團衣、高山巾、相銀帶馬鞍交椅卓子等物。○旨揮與入內司徒平章事黎貫。入內都督平章事黎榴等。守備城池等役。日夜嚴加巡警。內外如法。○八日丁未。

帝如藍京。癸丑。至藍京。是夜雹。○十五日。帝親率百官。拜謁山陵。乃旨揮藍山等陵官。係本祠各役。務要誠敬精潔。斬木伐竹。採取柴薪。寢廟用牛四。擊銅鼓。軍士謹應樂。武奏平吳破陣之舞。文奏諸侯來朝之舞。大司徒黎秘。詣昭孝王、忠勇王廟。用牛三。尙書令黎康。詣弘祐大王廟。用牛一。○內密院副使杜時暉卒。○二十一日。宴扈駕文武及外任致仕等官於藍京行殿。賞錢有差。明日。旨揮與大臣。議定藍山山陵廟殿號。正殿曰光德。曰崇孝。後殿曰衍慶。又令清化府軍。造太皇太妃寢宮於藍山陵殿西。○三十日。帝至自西京。是日有青黃赤白氣。如虹蜺抱日。○三月二日。命入內都督平章事黎醴等。往太原鎮界上。公幹入內。大行遣知三館事。入侍經筵。陶公僕。西道行遣阮有光。北道行遣黎景徽。審刑院使程真。內密院同知黎懷之。偕行至太原界上。三司官不至。

乃還。時太原與廣西太平府州接境。其鎮州頭目農散及譚寬。互相殺掠人口牛畜。以占越地方。故有是命。○夏五月。諸鎮路府縣官朝賀。畢辭回。帝召入謂之曰。爾等任官歸。當使民力於耕農。斷獄務以公平。如有盜劫。當用心捕捉。不可無情怠慢。○八日。木忙宣慰車羅。順每州經畧使道車。越州知州道蘿。玉麻觀察使琴軻等。來獻方物。賜錢各有差。○十五日。旨揮大臣內外文武百官等。爲人臣當盡其職。大臣則左右厥辟。變理陰陽。進賢退不肖。以圖政治。諸衛管軍官。則撫恤軍士。練習武藝。不可私自差使科歛。擾害侵損軍需。以爲私惠。五道行遣等官。則建明便害。甄別善惡。民命政事。簿書獄訟。要處置得宜。不得徇私滅公。以傷治體風。憲官則繩愆糾謬。激濁揚清。不可挾私論事。及畏縮緘默。內密院則遵奉典憲。敷奏詳審。不得倚法作弊。有所要求。刑獄官則鞠

封明白。仲理冤枉。務在得情。不可恣受囑托賄賂。以致沉滯冤濫。府路州縣等官。宜宣布德意。撫字部民。詞訟賦役。務要廉平。不可以財貨媚事上司。以希進用。殿前殿後各局各庫等官。則嚴加檢納。不可廢公營私。乾沒侵蠹。學官則謹守學規。教訓諸生。務使成才。不可玩視歲月。廢弛學業。其各司局署等官。亦宜克勤厥事。不可怠惰僥倖。凡爾百官。各宜遵守奉行。依旨揮。○二十一日。旨揮殿前各軍五道府鎮總知等。此番會集軍期。各將割詣山場斫木。共用心督押。斫取如法。餘在本土分點目。整飾器械。練習武藝。不得留與軍人。遊戲道路。及科歛差使私役。○二十二日。入內少尉參知政事黎陵。進聘陀國公主禮物。以其男黎瀑爲駙馬都尉。仍賜以侯服廐馬。○監京潭水赤。○二十三日。給諸王公主大臣文武百官歲俸錢。各有差。西道都督黎榴奏曰。臣嘗見民間

迫於困苦。雖一錢之微。視之猶十。緣此奏辭歲俸。陛下不以臣有罪。特賜戶五十。而俸錢一歲所入。必又加倍。今當給百官歲俸錢。臣乞辭。○二十八日。聖旨與南策上路至靈縣陶穀社社正故阮文調妻阮氏。爲節婦。聽給黃榜旌表門閭。仍免子孫各十一人奉養。○御史中丞范瑜。副中丞程文徽。監察程篤。裴祐等。劾奏車騎衛義武軍管領阮原通。於今年會集軍期。差使軍人私役。及餘放回家追錢入己。請寘於法。以警其餘。○六月。免黎受於天牢。○冬十月二十五日。遣倍臣黎文老。阮廷美。阮居道。鄧惠。一作如明。歲貢並謝賜袞冕。○十一月。有虎入城中。延祐寺。遣御前各執刀。捉殺之。○丁丑四年。明天順元年。春正月。明景泰帝有疾。群臣武清侯石亨。與掌兵都督張靛。靛。張輔子。左都御史楊善。副都御史徐有貞等。迎上皇。即英宗。復位。改

元天順。○二月朔。明廢景泰帝。仍為郕王。歸西宮。是月十九日。郕王薨。妃嬪唐氏等。俱賜紅帛。自盡以殉葬。○秋。八月至九月。大風。○九月二十六日。明遣正使尙寶寺卿。兼翰林院侍讀黃諫。副使太僕寺丞鄒允隆。來告英宗復位。立皇太子。並賜綵幣。○冬十月十四日。帝遣正使南道行遣左納言知軍民簿籍黎希葛。副使翰林院侍講鄭鐵長。中書起居舍人阮天錫。監察御史陳驚等。往明國。賀卽位。並立皇太子。及謝賜

綵幣。黎希葛。梁江藍山人。

戊寅。五年。明天順二年。會試天下舉人。賜阮文僊等進士出身。

己卯。六年。明天順三年。順冬十月三日。諒山王宜民夜作梯。分三道。上東門城。盜入宮禁。帝及宣慈皇太后俱遇害。先是宜民母楊氏賁。得罪於太宗。宜民不得立。乃陰懷異圖。窺竊神器。與其徒范屯。潘般。陳陵。唱率無賴

之人凡百餘。乘夜作梯。入城犯宮禁。帝遂遇害。明日。皇太后亦遇害。內人侍候副掌陶表死之。時黎得寧以都指揮。典禁兵當直。不能率先衛杜。乃擁兵助逆。故宜民得潛位號。而文武臣僚。飲恨茹痛。四方百姓。如喪考妣。至光順元年。冬十月二十四日。招魂葬于藍山穆陵。廟號仁宗。其上尊睿號。曰欽文仁孝宣明聰睿宣皇帝。

潘孚先論曰。仁宗以幼冲嗣位。內有母后垂簾聽政。外有大臣同心輔治。故十七年間。天下太平。安居樂業。稱爲仁慈之主。及其晚年。遭屯。般無賴之徒。唱率厲德侯宜民。夜間梯城。盜入宮禁。帝及宣慈皇太后俱被害。悲夫。

又按光順中興記云。仁宗年方二歲。裔未也履五乾。太后阮氏。牝鷄司晨。都督黎大。狡免執命。女君眯目。坐閨內以垂簾。戚里貪饕。自寰中

而噓虐。權倖用事。賄賂公行。文教闕聞。以冰消。賢才屈翹。宿儒如李
子晉、程舜俞。投之散地。面墻營營。而蜂起犬鼠呀牙。宰臣如黎龍、黎
察。不辨六畜。掌兵如黎顛、黎練。不明四時。良臣如鄭可、克復。驟以顛
擠。才士如阮夢荀。投之禍害。冤無控訴。事總覆隳。文階如公僕。將周
入。宰臣如黎醢。不識一丁。少者罔念而作狂。老者不死而成賊。賣
官鬻獄。好富疾貧。賢能為社稷之棟梁。空空掃地。文章關國家之氣
運。寂寂塞茅。諂媚申堅。刀筆進用。行遣阮有光。內密黎懷之。宦官纒
五六輩。無一人以闔門。禁衛黎得寧。指揮黎弘毓。衛士見八九徒。無
一人以擁楯。人情洶洶。道路嗷嗷。戚里如文老。昌黎心同鬼域。具臣
如陳榴杜。私誰不哂呵。門闕脆弱。手能排毀。乃率鴟狐之旅。潛蓄篡
逆之謀。賊臣范屯、潘般、陳陵、吳莊。及狗彘三百餘人。夜敢梯墻。盜透

如入無人之境。帝及太后。俱被害。悲夫。

○初七日。諒山王宜民。自立即皇帝位。大赦。改元天興。十月三日以前。著延寧六年。七日

日以後。著宜民天興元年。賜內外文武百官。覃恩一資。其偽赦文云。朕以太宗文皇帝長子。昔已正位東宮。不幸先帝東巡。忽崩于外。阮太后欲固權位。潛令內官謝清。取邦基。立以為君。俾朕奉藩。後謝清泄其事。及太尉鄭可、司空鄭克復。乃併殺之。以滅其口。故自此以來。旱蝗相仍。災異屢見。饑饉流作。百姓困窮。延寧自知非先帝子。且疚心離散。乃於今年十月初三日。命朕代位。朕仰賴皇天眷顧。宗廟保佑。暨諸王大臣。中外文武百僚。同心推戴。請朕宜承大統。再三勸進。朕不得止。乃於今年十月初七日。即位。改號天興。○是月。宜民遣黎景徽、阮如堵、黃清、阮堯咨等。如明歲貢。并解余珠事。○二十日。又遣陳封、梁如鶴、陳伯齡等。往明國求封。

152
10
34

按阮伯驥穆陵碑文云。帝神采英俊。容止端重。每朝暇。親詣經筵講學。日西乃輟。既親政。祀饗神祇。追奉宗廟。事太后致孝禮。和兄弟盡友愛。惇叙宗族。尊禮大臣。崇尚儒術。察邇言。納忠諫。勤政事。謹賞罰。重農務本。視民如傷。不興土木。不事遊畋。不邇聲色。不耽財貨。厚往薄來。內寧外撫。戒勅邊將。勿開罅隙。及占城再寇化州。乃命將出師。擒其主賁該。大邦畏威。小邦懷德。凡政事。率由舊章。皆有成應。命廷臣畢會議當。然後施行。故善政善教。敷于四海。群生仰德。世用丕平。暴崩之日。百姓若喪考妣。夫帝以如是之資。而有如是之變。豈非天地之大。而人猶有所憾也歟。

大越史記本紀實錄卷之二終

152

5

34

